

東
華
續
錄

臣王先謙敬編

臣張式恭恭校

五月乙未朔前杭州將軍國瑞奏據副都統翼長成保等稟報我軍失利之後馬步兵勇收集無多在曹州關廂暫紮總兵陳國瑞所部百餘人退入西南民寨四月二十五口在曹州府城西北將親王僧格林沁忠軀尋獲擡至府城內暫行安置查看忠軀脖項傷七處右膀傷一處並聲明前次賊在高莊卽高樓集一帶盤踞僧格林沁卽諭馬步分隊進兵已將賊壓退數里該逆從後包鈔我軍腹背受敵全軍敗退遂在荒莊紮營乃賊勢過重紛紛圍築營壘四面台攻是夜僧格林沁督帶馬步兵勇一齊闖出重圍殺賊亦復不少但賊匪恃眾更番來撲官員兵丁皆不辨東西前途

一片柳林一經馬步穿過左右兩面賊又來撲僧格林沁受傷落馬兵心無主黑夜星散等情見在該逆因我馬步潰敗在鄆鉅之交盤旋勢愈猖獗臣所帶三營數不滿千其餘勇隊星散無蹤雖經派弁設法分投招聚而軍械鞭馬不全難以追剿惟有一面督飭糧臺妥爲經理該親王身後事宜俟道路疏通將靈柩迎回濟甯選派官兵護送回京仍一面督飭各局與馬步兵勇籌備器械鞍馬再圖剿辦再山東藩司丁寶楨一軍僅有三千名難抵強寇臣見令該藩司將所有勇隊分布濟甯州城西南一帶輪守運河以顧北路猶慮勇數尙單鞭長莫及查有徐州鎮總兵詹啟綸帶勇三千名自韓莊渡河駐紮碭山業已檄飭詹啟綸星馳來濟期與丁寶楨先行併力防守運河一俟臣收集各隊卽行會督進剿總兵陳國瑞於大軍潰散後帶領零星勇隊究竟屯紮何處業已

派員往查翼長全順營總何建釐有無下落並打仗受傷陣亡馬步官兵勇丁統俟臣確切查明辦理至提督劉銘傳一軍聞已由徐州移營與臣軍較近自應傳旨催令趕緊北上以資攻剿上諭內閣科爾沁親王僧格林沁爲國捐軀死事甚慘眷懷忠藎悲痛實深頃覽國瑞所奏悲感之餘中懷稍慰卽著國瑞間敬銘分飭所屬官弁小心照護俟伊子伯彥訥謨帖及侍衛克興阿等到時多派弁兵隨同護送該親王靈櫬回京並著沿途地方官妥爲照料俟到京時再行親臨賜奠以慰忠魂○諭軍機大臣等皖豫髮捻見在竄擾山東濮范曹單一帶逼近開州長垣勢欲渡河而北僧格林沁見在山東督軍戰歿於陣賊勢愈熾難保不蓄意北犯各處伏莽甚多欲靖外匪必先清內奸京師五方輻輳難保無奸徒得以藏匿並著萬青黎卞寶第五城御史一體密飭所屬清

查保甲嚴詰奸宄以消患萌切須認真辦理毋得視為具文將此各密諭知之○諭前因僧格林沁在曹郡追賊遇伏陣亡當經諭令曾國藩攜帶欽差大臣關防統領所部各軍星夜出省前赴山東於北面擇要駐紮督勦昨據劉長佑奏稱賊匪竄至濮州荷澤范縣各屬境內馬賊復竄開州屬境在黃河南岸試水深淺另股馬賊攻撲東明縣城均經官兵擊退聞敬銘奏賊匪已趨張秋之南有直犯省城之勢該撫見由東昌折回濟南防守各等語督師重臣失利陣亡軍情渙散遠近人心聞風震動土匪從而生心勢將到處蜂起見在南自曹郡北至東昌數百里間一片賊氛勢甚兇惡東省僅止丁寶楨所部三千人扼守濟甯能守而不能戰此外並無大枝勁旅足資攻勦賊眾盤踞該省縱橫自便濟南省城兵力甚單設被該逆圍攻勢亦岌岌可危且德州一帶與直隸河

間接壤距京甚近尤恐蓄意北趨震及畿輔是江南北來援軍遲到一日則逆餒之鴟張日甚一日後患將不可勝言曾國藩李鴻章均係公忠體國大員素能顧全大局際此軍情萬緊之時自當多撥援師迅速北上前經諭令曾國藩先將總督關防交萬啟琛收存不必俟李鴻章到金陵後交卸著卽就見有所部剋日統帶出省兼程馳赴山東一面檄調各軍一面先就見有之兵繞由賊匪北面向南偏剿保衛畿疆所有江北一帶及層啟綸等防剿各軍均可酌量調遣分籌布置洋船由海道行走勢甚迅速李鴻章務當於所部各軍內商撥勁旅數枝速派得力鎮將統帶由上海乘坐輪船北駛或由膠州登岸西趨濟南或由天津登岸由景德地方南趨東省均著李鴻章酌量迅速辦理聞敬銘見回省城防守務當查拏奸細先清內患以待援師毋稍大意水套一帶尙有

伏莽未靖著劉長佑會同閩敬銘嚴飭在防將士實力堵扼毋任句結北渡致誤大局直隸地廣兵單劉長佑務須嚴密扼守大名一帶河岸毋任賊蹤偷越景州吳橋一帶兵力較單甚覺空虛並著劉長佑添兵防守劉銘傳本係直隸提督且疊經降旨催令挑兵數千迅赴劉長佑軍營著懷遵前諭辦理不必再候曾國藩札知儻再遲延觀望必重治該提督以貽誤軍務之罪本日復諭令官文等將楚北姜玉順所部九營飭令迅赴直東交界地方聽候劉長佑閭敬銘調遣劉長佑等俟此軍到時咨商辦理何省軍情緊要卽由何省調往剿賊直隸地方平衍曠邈並著劉長佑飭令地方文武辦理堅壁清野力行團練以助兵力務須由官督辦不可任聽紳民自行專擅以杜流弊國瑞見駐濟甯著卽招集潰散撫綏將士重整軍威牽制賊勢一面與丁寶楨所部剿捕土匪毋

令乘隙紛起僧格林沁忠骸仍著國瑞聞敬銘速行尋覓棺斂前
經明降諭旨派克興阿等四員馳驛前往該營迎護僧格林沁靈
柩本日復准令伯彥訥謨祜偕同克興阿等馳驛前往著國瑞聞
敬銘於伯彥訥謨祜等到東時妥爲照料令其扶柩速行回京該
貝勒一腔悲憤並著國瑞聞敬銘畱心防護毋令有冒險直前之
舉是爲至要鮑超所部霆勇八千行至楚北潰散見已竄至江西
義甯州恐其闖入皖南滋擾著李鴻章畱心探訪飭令皖南防軍
堵扼毋令竄入境內蘇省地方仍須分兵布置毋稍大意將此由
六百里加緊又緊諭知曾國藩國瑞劉長佑李鴻章聞敬銘並傳
諭劉銘傳知之○諭本日據國瑞馳奏尋獲僧格林沁忠骸安置
曹州府城調詹啟綸兵前赴濟甯並劉銘傳已由徐州移營各摺
片僧格林沁忠勇捐軀見經尋獲遺骸受傷至八處之多覽奏益

深悲憤本日已明降諭旨令國瑞妥爲棺斂俟伯彥訥謨祜會同克興阿等馳抵該郡時卽由國瑞派撥得力將士聞敬銘酌撥員弁妥速護送回京矣詹啟綸一軍卽著國瑞飭令迅速移赴濟甯與丁寶楨之軍扼截運河毋令賊眾搶渡並著國瑞招集潰散士卒整理器械拊循鼓勵以期重整隊伍惟此全軍挫失之後士氣驟難復振卽使陸續收集亦當加意休養一時不可令其出隊聞敬銘亦當飭令各路防兵分守黃運兩河毋任賊蹤搶渡以固大局劉銘傳業由徐州移營著卽迅帶所部繞赴劉長佑軍營力固畿南門戶毋得片刻稽遲致干重咎陳國瑞見在何處民寨著國瑞聞敬銘查明飭令該員收集散亡赴聞敬銘軍營聽候調遣卽由該撫飭令會同劉銘傳截擊賊匪遏其北竄之路僧格林沁殉難情形國瑞此奏仍未甚詳細仍著國瑞續查具奏將此由六百

里諭知國瑞劉長佑聞敬銘並傳諭劉銘傳知之○諭孫長紱奏
援閩霆營譁謀退回見籌撫馭一摺前因霆營抵鄂潰散生變疊
經諭令湖廣等省督撫派兵扼截並將援閩霆營妥爲拊循毋令
煽惑滋事茲據孫長紱奏湖北叛勇已竄義甯州境內距新昌縣
不遠見飭普承忠等迎擊援閩霆營鼓譟劫餉旋經婁雲慶撫定
見由省局寬籌銀米妥爲安輯各等語叛勇已至新昌其爲圖由
袁吉璽聞已可概見著孫長紱飭令普承忠等乘其喘息未定併
力迎擊並飭劉于濬督飭水師嚴防贛河毋任偷渡左宗棠亦當
豫籌布置毋令此起彼卒由江入閩致滋延蔓援閩霆營因米糧
缺乏譁謀劫餉雖經婁雲慶卽時撫定若非江省迅籌接濟亦無
以收定軍心孫長紱當督飭省局寬籌銀米陸續接濟不得以省
省從事致誤大局鮑超離營後霆營叛逃譁潰之事層見疊出朝

廷念其前勞未忍卽行加罪該提督宜如何感激圖報見在咸甯
叛卒一意南趨婁雲慶所部各營退駐會昌白埠地方鮑超若再
不迅速東下拊循約束萬一潰勇勾結閩氛又成不了之局該提
督自問當得何罪著駱秉章傳知鮑超懍遵疊次諭旨剋日起行
星夜趨程前進馳赴鄂省探明潰勇趨向分別招集遣散並迅赴
江西統領婁雲慶所部霆營入閩會剿力贖前愆至鮑超帶兵出
關剿賊之命疊經有旨停止孫長絨可卽傳知婁雲慶宣布各營
俾軍心得以綏定不至別滋事端是爲至要官文前奏有派成大
吉等進截潰勇之語此時該勇已竄江境並著督飭成大吉等越
境跟追會合江西省官兵前後夾擊毋得稍分畛域姜玉順所部九
營前據吳昌壽奏因轉餉多艱已令回防歸伍見在直東軍務緊
急自應厚集兵力迅殄狂氛著官文卽飭姜玉順統帶所部九營

迅赴直隸山東交界地方聽候劉長佑閻敬銘調遣其行裝口糧等項官文卽日籌款給發不得以餉絀爲詞稍事遲玩東南兩軍僅餘閩海一隅圍剿合宜可望盡殲醜類若霆營別有變局則逆匪乘機出竄必將餘燼復然左宗棠當妥籌兼顧防患未然不得稍分畛域貽患鄰省將此由六百里諭知官文左宗棠駱秉章並傳諭鮑超孫長紱知之○諭成祿奏行抵固原由雷正綰籌撥六營剋日前進並請飭調穆圖善軍營馬步各隊各摺片據稱該提督抵李旺堡行營面晤雷正綰具悉嘉峪關失守肅州糜爛甘涼二郡岌岌可危若非厚集兵力先扼甘涼則河西賊氛日熾且關外見無進兵之路必須節節掃蕩方能振旅出關所奏情形與都興阿等疊次奏報相符雷正綰見於所部各營內抽撥六營並籌給軍械馬匹銀兩等項交成祿統帶卽著如數抽撥俾資攻剿成

祿派員先赴蘭州一帶添募新勇並剋日督隊進省所有募勇章程及進剿事宜卽著與恩麟會商妥辦惟甘省同民性情狡詐良莠難分該提督新募勇丁務須精加選擇不准夾雜回勇以杜後患並著成祿趕緊添練勇丁星速督隊西行陶茂林一軍諒已馳抵西路卽著與成祿之軍聯絡進剿節節掃蕩並著恩麟嚴飭地方文武及在防各軍合力兜剿聯捷已由晉省起程前進刻下想已行近甘境卽著探明成祿軍營星速前往會合進剿聯捷所帶馬隊五百名前已諭令統歸成祿統帶足資調撥穆圖善所部攻剿甯夏正在得手未便分兵西進成祿所請飭調金順等起馬隊之處著毋庸議鶴齡統帶川軍尙未馳赴西路仍著駱秉章飭令剋期飛速前進毋再遲延致干重咎鶴齡到甘後卽著成祿爲調派成祿俟聯捷等軍到齊務當激勵將士將關內肅甘等賊

匪迅速剿滅早日帶兵出關肅清邊境至甯夏軍情近日未據都興阿等奏報著都興阿穆圖善雷正綰分飭各軍迅速攻拔甯靈剋日出關大張撻伐以紓朝廷西顧之憂該將軍等責任綦重必能迅奏膚功速行蒞事也將此由六百里諭知都興阿穆圖善雷正綰駱秉章成祿聯捷並傳諭恩麟陶茂林知之○命醇郡王籌辦京城防範事宜旗綠各營均歸節制○以僧格林沁陣歿奪副都統成保職逮問○丙申諭內閣禮部奏僧格林沁剿賊陣亡奉旨以親王飾終典禮議卹應否輟朝等語欽差大臣科爾沁博多勒噶台親王僧格林沁督師有年功勳卓著此次剿賊遇伏陣亡覽其死事情形甚爲悲愴著卽輟朝三日以示悼念忠藎至意○諭軍機大臣等前日據國瑞奏僧格林沁督軍追賊在山東曹州城西遇伏陣亡已有旨令曾國藩星夜帶兵赴東督剿並令劉長

佑等嚴密布置以固畿疆惟北路緊要必須寬籌兵力方足以資調遣著麒慶連成於接奉此旨後不動聲色於熱河密雲地方各挑選精壯兵丁二千名配齊軍裝器械選派得力大員管帶勤加訓練聽候調遣該都統等惟以彈壓土匪爲名萬勿稍事張皇以致人心惶惑將此由六百里各密諭知之○諭吳棠奏官兵偏賊回竄見嚴邳宿之防劉銘傳一軍由徐赴直接濟兵食江湖水師不便入黃吳昌壽奏添兵渡河嚴防北岸各摺片賊蹤距清淮較遠吳棠見派張從龍張樹聲等軍分扼宿遷等處之防黃翼升水師暫泊邳宿之間策應著卽與彭玉麟會商妥籌布置以期周密賊匪北竄後僧格林沁中伏陣亡該逆麇集濮范荷澤一帶山東兵力甚單該漕督所派總兵趙三元統帶輕利礮船四十號前赴濟甯務卽催令迅速北駛與東省丁寶楨等駐紮濟甯之軍妥籌

策應劉銘傳見已由泗赴徐挑隊赴直著該提督懷遵疊次諭旨迅速前赴直隸與劉長佑會商勦辦以固畿輔之防直東軍情緊急如再遲延致誤師期該提督自問當得何罪吳棠擬請就黃河船隻添置礮位配以濱黃兵弁駕駛一節是否可行著劉長佑閻敬銘妥爲斟酌並著吳棠於水師兵弁擇其能入黃駕駛熟悉地形者趕緊辦理庶於軍事有濟閻敬銘見已折回省城北路未免空虛儻賊以虛聲恫喝悉銳北趨萃冠朝觀一帶伏莽所在響應直邊將有防不勝防之勢著閻敬銘斟酌緩急迅速添派勁旅嚴備東昌張秋一帶杜其聲東擊西之計毋得稍有疏虞致干重咎豫省東路河防考城蘭儀密邇山東曹單最爲喫緊北岸則龍門口正當其衝吳昌壽見派湯聘珍所部三千會同崔廷桂及河北鎮道嚴密堵遏南岸復有宋慶張曜等軍防守尙屬周至著嚴飭

北岸防兵與直隸官軍聯絡聲勢遇賊卽擊並催調譚仁芳四營
迅由許州拔營前進駛赴北路擇要布置以厚兵力如賊勢西趨
並檄宋慶張曜各軍沿河攔截毋稍疏虞直隸防兵未厚北路宣
化大同等鎮標兵除畱本地彈壓剿捕土匪外並著劉長佑揀調
數千隨時聽候調遣以期緩急可恃本日又據祁寯藻奏畿輔防
堵緊要酌保人才以資任使所保之余承恩楊毓枬等十一員著
該督查明是否均在直省酌量器使其提鎮以下實缺將弁如有
調赴他省軍營者並著調回本任以重職守原單鈔給劉長佑閱
看山東東昌兗州泰安直隸大名河間等處著劉長佑間敬銘慎
簡牧令聯絡紳民協剿妥籌堅壁清野之法以輔兵力所不逮傳
振邦前隨僧格林沁剿賊屢著戰功該員見在何處著閻敬銘咨
令赴東會籌防剿張曜一軍素爲捻氛所憚能否飭帶所部渡河

而北與直東官軍聯絡擊剿著吳昌壽酌量檄調河南安徽之汝
光潁毫一帶爲捻蹤潛匿之區吳昌壽喬松年務卽選派員弁帶
兵駐紮消患未萌此時賊勢猖獗僧格林沁以督師重臣竟以追
賊陣亡各該省督撫提鎮當如何力圖整頓痛殄逆氛儻逆蹤竄
擾何省該省督撫提鎮並不督兵出境實力助剿定當重治其罪
不稍寬貸曾國荃前已諭令來京陛見或徑赴軍營著曾國藩再
行嚴催飭令酌帶親兵趕緊北上毋庸另募新勇稽延時日並著
李瀚章就近速行宣諭剋日起程正在寄諭閒據劉長佑馳奏賊
勢猖獗請令劉銘傳刻速前進並請派曾國藩統師北上等情與
疊次諭旨適相脗合所稱陳國瑞身受重傷衝出重圍暫投民寨
收集潰勇復與追賊接仗轉敗爲勝各等語陳國瑞未能救援僧
格林沁本屬咎有應得姑念其從前打仗奮勇屢著戰功且此次

身騎俱受重傷困苦情形不無可憫姑免置議劉長佑惟當令其
收集潰散繞赴北面努力擊賊爲僧格林沁復仇該總兵部伍如
距閭敬銘軍營稍遠卽著徑赴大名軍營聽候劉長佑調遣此旨
卽著劉長佑傳知將此由六百里加緊諭知曾國藩劉長佑吳棠
閻敬銘吳昌壽喬松年李瀚章並傳諭劉銘傳知之○諭官文奏
霆營勇丁潰散滋事派兵追剿生擒匪首二名見飭出境剿辦一
摺另片奏請將霆營營哨各官分別革職賞假免議並變異私逃
各員請飭鮑超自行查明分別參辦等語霆營勇丁路經鄂口金
口地方乘間潰散至咸甯縣冒充官兵戕害知縣羅琳及其幕友
家丁在城鄉肆行擄掠經提督唐仁廉等率勁卒馳剿官文派成
大吉等率營繼進追至江西義甯州之藍圖嶺地方該匪膽敢頭
裹紅巾設立卡座抗拒唐仁廉等攀援上嶺斃逆首陳大發等生

擒把總林汶瀧等二名解省正法成大吉隊亦至沿途斬馘頗多
解散尤眾見已追至白沙嶺地方著官文督飭成大吉等越境追
剿不得稍分畛域並著孫長絨嚴飭水陸各軍認真堵截毋任再
有竄擾以期一鼓聚殲靈營副將孫得友參將閔玉林都司胡達
萼記名總兵副將鄧雲貴副將馬勝泰遊擊姜先兆卜先兆劉致
友赴官文衙署伏地請罪並求給假回籍省親治喪就醫該員等
均未從逆尙有天良著照官文所請一併暫行革職假滿後仍赴
靈營效力贖罪以觀後效記名提督唐仁廉等當靈勇潰散卽能
帶兵追剿擒斬首逆功過尙足相抵均著加恩免其置議此外營
哨各官或隨同背叛或乘閒私逃均屬法無可貸著鮑超自行查
明分別從重參辦如尙有樸實奮勇材堪造就者亦著該督查明
分別去畱妥爲經理該提督當懍遵疊次諭旨星夜馳赴江西探

明潰勇尙有若干會同楚西各軍實力剿防毋貽後患如敢遷延
必當治以約軍不嚴之罪懷之官文又片奏據記名提督姜玉順
呈稱勝勇中營營官歐吉魁因秉性慈柔恐其不善約束改委副
將聶光明接管詎該營都司李有年覬覦管帶所圖未遂糾約千
總談義發守備王禮福楊大有把總陳得高等藉索餉爲名將歐
吉魁等毆傷並敢排列槍礮竟思抗拒實屬目無法紀經姜玉順
究問明白當將李有年談義發王禮福楊大有陳得高五犯立時
正法各營賴以安靖辦理尙爲安速著官文傳知姜玉順隨時妥
爲彈壓毋任再滋事端正在寄諭閒據駱秉章奏通籌兵餉緩急
請飭鮑超一軍就近先剿河南髮捻各匪一摺鮑超舊部疊諭無
庸西行此時潰勇未清自應仍令督率所部由鄂赴江將餘逆剿
除再行相機進剿將此由六百里諭知官文駱秉章並傳諭鮑超

孫長敘知之○諭雷正綰奏官軍連克官橋堡老巢擒斬要逆並成祿抵營見飭督同鶴齡前進恩麟奏陶茂林部勇潰散賊匪圖撲安定曹克忠剿賊獲勝各摺片甘省回逆踞伏黑城子迤北東西兩山並堅踞李旺堡扼守中路經雷正綰分軍三路進剿疊將沿途各賊巢一律平毀乘勝攻拔官橋堡李旺堡老巢生擒逆首木混等四十餘名正法官軍直薄預望城老巢曹克忠已進兵同心城剿辦諒易得手惟陶茂林所部勇丁因索取積年欠餉攜帶軍器號衣紛紛潰逃者約數千名省垣見已震動逆匪復乘虛直撲安定縣城陶茂林所餘十數營退紮該縣城內外兵力較單恩麟見已飛咨雷正綰轉調曹克忠之軍星速馳援該總兵所部見偪同心城老巢攻剿正當喫緊刻下能否抽赴安定一帶剿賊或另有勁旅可以調派前往著都興阿穆圖善雷正綰迅籌妥辦其

營內潰勇竄逃何處難保不爲逆回誘煽勾結著陶茂林恩麟設法招集並飛檄各路軍營及沿途州縣一體遏截毋任滋擾陶茂林見存各營務當妥籌鎮壓鞏固軍心力守安定待援毋再稍涉疏懈成祿抵甘後經雷正綰撥給六營鶴齡亦已行抵秦州目前省防喫重安定危急著成祿迅帶所統六營督同鶴齡所帶川兵迅卽取道安定先解該城之圍兼顧省城防務聯捷管帶黑龍江官兵前已據報由晉起程並著成祿飛咨該大臣星速赴甘會師前進不准稍涉延緩俟將安定等處逆匪掃蕩卽移師進剿肅州甘郡回逆以期次第廓清雷正綰一軍進攻預望正在得手距靈州僅三百餘里著卽乘勝進剿與曹克忠所部迅拔預望同心兩城規復靈州卽可與都興阿等軍聯絡進取都興阿等仍當懷遠變次諭旨迅籌攻拔甯夏郡城以牽賊勢雷正綰各營糧運匱乏

著劉蓉遵照前旨將該軍所需糧石等項按月如數籌解源源運濟以期士馬飽騰毋許稍涉延玩致令停兵待餉坐失事機曹克忠帶兵入甘屢克城堡近復將撲營賊匪擊敗斬馘甚多洵屬異常出力著雷正綰恩麟傳旨嘉獎諭令始終奮勉以蕆全功將此由六百里諭知都興阿穆圖善雷正綰劉蓉成祿並傳諭陶茂林恩麟知之○命山西在籍總兵官余承恩赴直隸軍營聽候總督劉長佑差委○諭禁江蘇畝捐積弊○諭麒慶等於熱河密雲選精兵二千備調遣○改丁憂甘肅提督陶茂林爲署任仍畱營賞銀三百兩治喪○丁酉諭內閣前因記名副都統翼長成保不能救護僧格林沁業經降旨將其先行革職並令國瑞查明參奏本日復據國瑞奏查明內閣學士翼長全順記名總兵營總何建龍隨同僧格林沁死事情形甚慘亦經明降諭旨將該二員加恩從

優賜卹矣其成保一員尙未據國瑞查參因思僧格林沁以親王
督師躬冒矢石屢蹈危機該管各將弁果能奮勇爭先不避艱險
皆如全順何建鰲等何至令統帥大臣竭忠畢命總緣畏葸性成
趨避計熟遂敢玩視軍律置主帥於不顧殊堪痛恨若不從嚴懲
辦何以肅法紀而振軍心卽如成保身爲翼長出隊時自應隨侍
僧格林沁左右何以四月二十五日夜間衝圍接仗並無成保在
內亦未身受一傷其爲首先潰逃情節顯然成保業經革職著卽
拏問交閩敬銘嚴訊確情從重定擬毋稍寬縱至其餘臨陣退縮
及援應不力各員仍著交國瑞確切查明據實參奏○諭軍機大
臣等國瑞奏匪踞黃河水套偏勒各處民圩見在趕緊招集馬步
分路設法辦理各摺片崇厚奏遵旨先行起程馳赴畿南一摺逆
匪竄至鄆城縣西紅川口東至王家古堆南至安興木邊馬時犯

曹州一路號召伏莽其勢甚張國瑞已派諾林丕勒等帶馬隊繞赴曹州會同成保富森保等招集馬步並調詹啟綸一軍與宋慶之軍由曹單取道曹州會合陳國瑞等所籌尙安惟成保業已擊問著卽飭令諾林丕勒富森保等馬步各軍自荷澤以北黃河南岸設法兜剿誠恐該逆東竄搶渡運河劉銘傳一軍已至單縣著卽取道金鄉嘉祥汶上濟甯等處由梁山一帶黃河南岸向西兜剿痛挫兇鋒仍當穩紮穩進不必貪功俟大軍到齊自不難一鼓殲盡陳國瑞收集兵勇誓欲出隊滅賊並聞其連日獲有小勝具見血誠勇敢所有郭寶昌勇隊均著陳國瑞統帶昨已有旨將陳國瑞加恩免議該總兵自當知恩圖報著國瑞傳知該總兵不可恃勇輕進再有挫衄見在曹州一路兵力漸厚而北路尙屬空虛該總兵如能繞赴濟甯會合丁寶楨等迎頭扼剿固屬妥善否則

設法渡河赴劉長佑軍營聽候調遣並著酌度辦理成保近年以來帶兵殊不得力自充當僧格林沁翼長人心渙散此次統帶黃旗親軍馬隊首先潰退僧格林沁死難該員未受一傷獨以身免已降旨拏問交閻敬銘審訊著閻敬銘卽將該革員提省嚴訊從重定擬具奏不准稍涉瞻徇代人受過其餘在事潰退各員仍著國瑞查明參辦崇厚奏取道景州前赴畿南著卽催調洋槍隊伍迅速赴景州一路扼防仍隨時與劉長佑妥商進止以固畿南門戶昨諭劉長佑挑宣化鎮兵備調其大同一路能否抽調著咨商沈桂芬妥籌辦理賊氛既有黃運河阻隔設防較易爲力劉長佑閻敬銘吳昌壽務當督飭文武員弁晝夜巡防不可稍涉大意給事中劉毓楠奏河南開封府中河廳南岸新築圈墻一道工料不甚堅實儻伏汛漲發易致潰決稍有疏虞關係非輕等語著張之

萬親歷履勘認真趕緊修築以固藩籬曾國藩諒已迅籌出省著
卽懷遵前旨剋日北上統率諸軍以期各將士有所稟承萬勿稍
涉遲緩髮捻旣句通水套諸賊裹脅愈眾而行走甚速遠調勢將
不及清淮駐紮之歐陽利見張樹珊等軍及揚防之吳毓芬一軍
可以調令北來較爲迅速吳棠調赴濟甯之趙三元礮船四十號
曾否到防著吳棠迅速調派清淮後路亦關緊要並著吳棠妥爲
布置應添兵勇著李鴻章另行抽調以作後勁彭玉麟前已到淮
相度水道著卽會同吳棠妥籌調度進止機宜以期水陸均有準
備劉銘傳軍餉仍著李鴻章籌解如一時援濟不及卽由劉長佑
閩敬銘妥籌解濟毋令缺乏直東餉項本不寬裕曾國藩所統各
軍應需餉項該大臣務與李鴻章寬爲籌備以利師行正在寄諭
間據閩敬銘奏回省布置情形賊竄至汶上河西飭劉銘傳於東

平汶上扼要嚴防等語與本日所諭辦法亦合著劉銘傳設法繞出賊前扼要堵剿不可令其北犯劉銘傳所帶兵勇究有若干如兵力不敷勦辦仍著趕緊續調所部以厚兵力聞敬銘另片奏自請從重治罪等語前因督師重臣在該撫所轄境內陣亡已有旨將該撫先行交部嚴加議處該撫當力顧省垣督飭將士嚴防賊匪北竄之路毋得再有疏虞致干重咎懍之愼之間敬銘片一件暫行畱中再降諭旨僧格林沁舊有馬步若干見在收集若干劉長佑所部各路在防兵勇共有若干著國瑞劉長佑詳晰開單奏聞將此由六百里加緊諭知曾國藩國瑞劉長佑吳棠彭玉麟張之萬崇厚李鴻章閻敬銘吳昌壽並傳諭劉銘傳知之○于山東曹州陣亡內閣學士全順祭葬世職如尙書例諡忠壯總兵官何建勳祭葬世職加等諡果毅均附祀欽差大臣僧格林沁專祠○

戊戌諭內閣前因山東巡撫閻敬銘布政使丁寶楨於所轄境內
未能加意協助致僧格林沁孤軍深入力竭捐軀業經交部嚴加
議處因思髮捻各逆上年擾及湖北境內湖廣總督官文以欽差
大臣督師勦賊其時楚師兵力甚厚如果調度得宜何難將該逆
就地殲除乃該督督辦日久未能使賊大受懲創僅以驅之出境
爲了事致令該逆得以遠颺實屬咎無可辭前任河南巡撫張之
萬責任封圻吏部左侍郎毛昶熙奉命督團勦賊於逆匪竄擾河
南境內未能督率兵民協同截勦均以空言敷衍任令賊匪乘虛
遠竄貽害鄰疆以致督師重臣戰歿於陣均有應得之咎追維前
事憤懣殊深官文張之萬毛昶熙著一併交部嚴加議處近來賊
匪竄擾之地各該省督撫往往意存畛域以驅賊出境爲了事以
致此勦彼竄迄無了期實堪痛恨嗣後各該省督撫等務當協力

同心互相策應於賊匪奔竄之路嚴密防維訂期合力夾擊庶幾軍務日有起色儻竟任其奔突不能遏截必惟各省督撫是問言出法隨決不寬貸○諭軍機大臣等前因北路喫重諭阜保等於吉林黑龍江挑選馬隊各五百名派員統帶馳赴直隸聽候調遣茲復據醇郡王奏神機營所練馬隊官兵爲數尙少不敷派撥請飭調吉林黑龍江馬隊各五百名並查有協領常海佐領特爾清阿二員曾經出師堪以管帶等語見在山東賊氛甚熾畿輔重地亟應豫籌防範神機營見練官兵馬隊尙嫌單薄必須添調訓練以厚兵力著阜保特普欽再於吉林黑龍江各挑選精壯馬隊五百名配齊軍裝器械卽派常海特爾清阿星速統帶赴京聽候神機營調遣愈速愈妙不得稍有遲誤其製辦軍裝等項銀兩卽著籌款發給准其報部作正開銷吉林地方馬賊甚多阜保惟當督

飭員弁認真查拏以期淨絕根株不可稍事粉飾致畱隱患將此
由五百里各諭令知之○諭前因直隸山東軍情甚緊疊經諭令
曾國藩統帶援師速赴山東繞由北面督剿賊匪見在賊匪盤踞
曹郡蔓延鄆鉅濮范一帶勾結土匪勢焰日張東省兵勇寡不敵
眾防不勝防直隸地勢平衍兵力未厚尤恐賊蹤竄渡黃河震驚
畿輔曾國藩接奉前次疊諭諒已籌調兵勇戒期啟行惟東省軍
情刻不可緩該大臣接奉此旨務當剋日統帶親軍小隊輕騎就
道兼程北上先就直東見有兵力妥籌調度其江南大隊援師儘
可陸續檄調北來曾國藩聲威久著早到一日則直東人心早定
一日李鴻章所部兵勇尙多除應畱防蘇省外如尙有可調之兵
務當儘數調撥揀派得力鎮將卽日管帶由輪船迅速北上俾曾
國藩抵東時卽可歸其調遣以期無誤攻剿直東豫三省地方公

事雖有本省督撫管理其各該省地方文武如遇有關軍務應行供支調度之件遲誤及不遵調度者卽著該大臣嚴參治以貽誤軍務之罪該大臣值此時勢艱難斷不可意存謙抑仍辭節制三省之命致往返再有耽延兵貴神速總以兼程繞赴山東北路調度一切保固畿疆爲目前第一要務劉長佑閻敬銘亦當就見有兵力分防黃運兩河一面勦辦土匪保衛完善地方不得專待援師稍存鬆懈河套伏莽本未盡除見旣爲賊眾盤踞則該處土匪船隻均可資以渡河劉長佑閻敬銘務須籌備礮船多撥兵弁嚴密防守儻任賊蹤北渡必當重治該督撫之罪唐訓方見駐省垣保定一帶守禦事宜責無旁貸著責成該藩司悉心籌畫經理務須周密妥善吳昌壽前已有旨令其出省勦賊著卽會同劉長佑嚴密防堵河岸並嚴檄河北鎮道及在防兵弁加意遏守毋稍疏

虞致干重咎劉銘傳已抵單縣諒可卽抵濟甯汶上一帶著卽酌量情形如賊氛甚熾將全部勇丁一併由周盛波統帶北渡陸續起程會合攻剿並著劉長佑閻敬銘審度賊勢會商劉銘傳迅速辦理富明阿前已有旨令其留於直隸軍營此時計已行抵直東地方著卽迅速來京毋稍延緩直隸滄州河間及山東德州恩縣一帶向有騎馬賊匪並著劉長佑閻敬銘派兵嚴拏毋令乘隙蠢動告病總兵鄭魁士久經戰陣見在是否在宣化本籍著劉長佑傳令該員前赴軍營助剿直隸山東河南近賊地方卽由劉長佑閻敬銘吳昌壽飭令該地方官辦理團練堅壁清野俾賊無所掠以助兵力所不及曾國藩一軍應需餉銀本日雖已諭令戶部寬爲籌備仍著劉長佑李鴻章閻敬銘吳昌壽協力籌解毋令缺乏正在寄諭閒據喬松年奏報皖省近日軍情一摺蒙毫一帶見在

黃鳴鐸李南華等軍扼守英翰張得勝等軍見在分防宿州雉河集等處布置尙屬周妥卽著該撫隨時會商吳棠聯絡聲勢以固邊境將此由六百里諭知曾國藩富明阿劉長佑李鴻章喬松年吳昌壽閻敬銘並傳諭劉銘傳唐訓方知之○諭見在髮捻各逆竄入山東曹州一帶勾結水套伏莽滋事深恐各處土匪乘機竊發畿輔重地防範不可稍疏盛京熱河察哈爾密雲山海關古北口等處切近京師爲東北屏蔽毗連邊牆內外漢回雜處最易藏奸難保無不法匪徒從中煽惑且各該處向多騎馬賊匪爲患地方此輩行迹詭秘來去無常更慮聞風滋擾著玉明寶珣志和德椿麒慶阿克敦布廉至連成長善徐廷楷各於所轄境內派撥得力兵弁認真巡緝以清奸宄而遏亂萌尤須不動聲色嚴密查拏毋徒滋擾民間轉致人心惶惑也將此由五百里密諭玉明寶珣

志和德椿麒慶阿克敦布廉至連成長善並傳諭徐廷楷知之○
諭御史張觀鈞奏請將投營之陳貫甲嚴密防範等語前據閩敬
銘奏稱東省臨邑人和團守備陳貫甲業經散團歸標安靜當差
惟見在山東官軍失利僧格林沁陣亡該守備無所震懾萬一故
態復萌託故歸里號召舊時團眾肆行強橫以滋後患是誠不可
不防著閩敬銘不動聲色留心察其行止動靜嚴密防範設法羈
縻不可稍涉大意將此密諭知之○諭聯捷奏督兵前進暫借陝
省軍器應用並陶茂林營勇潰散竄及盤屋境內擬卽帶兵協剿
各摺片聯捷所帶之黑龍江官兵既乏軍器自難責其徒手禦敵
聯捷請由陝省酌撥應用之處係爲因時變通起見尙屬可行卽
著咨商劉蓉先於陝省軍器內酌量撥用以利師行昨據沈桂芬
奏已將戰箭火藥等件趕造齊備派員解赴聯捷軍營俟此項軍

器解到即可如數歸還陝省前據恩麟奏陶茂林部勇潰散數營
當經諭令陶茂林等飛檄各路軍營沿途州縣一體遏截茲據聯
捷奏陶茂林營中潰勇擾及陝省寶雞迤東復竄至盩厔境內各
等語此起潰散兵勇數日之間已至陝境且沿途張貼告示強索
財物糧食斷非語言所能招集劉蓉已派隊迎截卽著該撫督飭
派出員弁實力扼截聯捷擬整隊以待儻潰卒侵犯省垣卽行帶
兵協剿著照所請相機會辦不可徒託空言聯捷帶兵無多見在
潰勇已及盩厔其勢漸熾且盩厔逼近南山萬一縱令入險則剿
辦又形棘手劉蓉身任陝撫責無旁貸著卽遴派得力兵勇扼要
嚴防毋令潰卒出境貽患鄰封尤不得令其竄入南山致滋延蔓
省城防守事宜德興阿務當會同劉蓉熟籌妥辦毋稍疏虞湖北
山西距秦甚近官文沈桂芬亦當一體嚴防毋令闖入如此股潰

卒不能堵截縱令出省又如宋懞詩故事惟劉啓德興阿是問楊岳斌前奏有取道荆子關之語見在通計師行定距入關不遠偵探潰勇蹤迹攔頭截擊毋令竄近鄂境至該督所部新勇倉卒成軍心志未必能齊此時霆營之勇既潰於楚陶茂林之勇復潰於秦儻竟聞風效尤紛紛逃潰於大局殊有關繫楊岳斌當嚴飭帶兵各員申明紀律約束拊循毋得稍涉大意前因僧格林沁剿賊陣亡東省匪勢甚熾曾經諭令楊岳斌先其所急移師馳赴直東會剿如已行抵西安卽暫紮候旨想該督接奉前旨後必能通籌緩急請命而行也將此由六百里各諭令知之○諭都興阿穆圖善奏近日剿辦情形請飭晉省籌撥餉銀並都興阿奏甘省籌剿機宜各摺片甘省紅柳溝等處賊匪爲官軍擊敗甯郡回首僞行乞撫都興阿限以時日令其交械獻城撤圩輸糧該逆仍復詭詞

乞緩是其詭詐情形已可概見見在受降既無把握自應鼓勵將士力行進攻不准仍許投誠懈惰軍情致墮詭計鹽茶應餘匪有圖竄中衛之信都興阿當派兵要路遏截毋令任意奔突甯夏圍攻日久尙未克復深恐師老疲敝都興阿穆圖善當設法迅行攻拔不可再事遷延雷正綰一軍見已攻克鹽茶進圖靈州陶茂林一軍本可直取肅甘因所部勇丁潰散數營安定一帶賊勢較眾尙復阻於西進曹克忠所部能否兼顧鞏昌移援安定著雷正綰妥籌商辦恩麟亦當添籌兵勇與陶茂林等互相聯絡力顧省垣俟蘭州附近地方肅清後卽當鼓行而西埽除肅甘並嘉峪關逆氛以通關外之路並著恩麟寬籌餉銀以濟軍食鶴齡一軍前已有旨令駱秉章催令赴甘仍著恩麟陶茂林飛速迎提飭令迅赴肅州成祿所撥雷正綰六營亦可由省城次第進取西路以助聲

威至甘省回匪到處皆有都興阿等俟甯夏克復後當與恩麟陶
茂林等會商先擇最要處所力行勦洗其餘自可迎刃而解穆圖
善亦可於彼時酌量帶兵出關楊岳斌俟抵甘後兵力厚集更可
分路進剿陳東霖所募楚勇兩營在鄂境擄掠殺斃六命業經降
旨革職著都興阿穆圖善於該革員到營時勒令將滋事勇丁交
出追出原贓一併解交官文等審辦以肅軍律所有該兩營楚勇
月餉仍著沈桂芬按照楚軍章程籌撥務須顧全大局不准再事
挾諉致渙軍心將此由六百里諭知都興阿穆圖善雷正綰沈桂
芬並傳諭陶茂林恩麟知之○命欽差大臣曾國藩督辦直隸山
東河南三省軍務地方文武員弁暨旗綠各營均歸節制調遣○
己亥諭軍機大臣等劉長佑奏賊蹤漸向東竄見籌添派兵勇分
布嚴防並陳國瑞見在曹郡招集潰散撥餉接濟各摺片濮范一

帶伏莽甚多此時逆匪方張襄脅勾結勢漸東趨劉長佑恐下游河防空虛飭令副將崔福泰等分帶兵勇自開州入公橋起至山東張秋鎮止沿河北岸節節駐紮具見不分畛域調度得宜著卽督飭在防員弁迅速進紮嚴密扼守惟兵力尙不甚厚賊至須互相聯絡併力協助方免疏虞張秋係黃運交匯之區深恐該逆勾結水套賊船竄黃入運徑行北趨著劉長佑閻敬銘籌備礮船在該處梭巡堵遏吳棠前奏有將黃河船隻改爲礮船之議卽著揀派熟習火礮水師弁兵前赴直東軍營教練演放以資得力其運河一帶仍著吳棠懷遵前旨速派輕利礮船駛往防堵閻敬銘督飭丁寶楨嚴守運河毋令東渡山東省城防守事宜及張秋鎮東南一帶運河並責成閻敬銘實力嚴防不准稍涉疏懈劉銘傳仍遵昨日諭旨酌量軍情將周盛波全部統帶北來會合直東各軍

相機防勦劉銘傳如已行抵濟甯卽著聯絡丁寶楨等軍嚴扼運河以遏賊衝陳國瑞見駐曹郡招集潰勇數千誓志滅賊奮勇可嘉劉長佑籌備糧餉軍械前往接濟實屬力顧大局仍著隨時源源籌餉解濟毋令招集之軍仍至潰散陳國瑞夙稱勇敢惟官軍新挫士氣不揚劉長佑當傳知該總兵穩慎圖功不可恃勇輕進國瑞仍收集潰卒力固運河扼賊竄擾見在東北各面布置漸密該逆無隙可乘必將西循熟徑擾及豫境吳昌壽務當先事豫籌派兵越境出奇夾擊以勦爲防使賊首尾不能相顧景州一帶防務緊要前已諭令崇厚統帶洋槍隊前赴該處扼防劉長佑當飛檄劉祺等軍星速到景協同防守以厚兵力將此由六百里諭知國瑞劉長佑吳棠閻敬銘吳昌壽並傳諭劉銘傳知之○諭富明阿奏憑陳傷疾未愈懇請來京就醫並請調派京兵挑選揚防得

力員弁帶赴直省堵剿各摺片前因直東防剿緊要諭令富明阿
留於直隸與劉長佑籌商堵剿昨復諭令富明阿迅卽來京該將
軍見已行抵新城距京甚近卽著仍遵初四日諭旨來京並准其
乘坐肩輿以示體恤所請調派神機營等兵赴直並挑選揚防得
力員弁帶赴直隸之處著俟該將軍到京後再行籌辦將此諭令
知之○諭傳諭護江西巡撫孫長紱孫長紱奏遵保援江出力員
弁併案請獎一摺鮑超一軍於上年秋間蹋毀許灣一帶賊壘克
復金谿並收降陳炳文股匪壘次獲勝肅清瀘溪南豐兩縣蹋平
大洋中田賊壘克復新城縣城並將吳口渡等處及甯都城外賊
壘平毀立解城圍克復瑞金縣城江西全境一律肅清該將士均
屬著有勞績惟宋國永馮標所統各營已在鄂省金口一帶潰散
滋事見經官文派兵追擊孫長紱派兵在江西境內截剿此項滋

事弁勇礙難一律施恩著孫長紱咨明鮑超將此項弁勇查明開除速行另繕清單奏請施恩至婁雲慶所部將士是否均能安靜守法著孫長紱先行傳知該總兵宣諭在營將士如果安靜守法者均照所請給獎一俟鮑超查明奏到朝廷必當立沛恩施以獎勤勞○諭楊岳斌奏抵陝催軍進發劉蓉奏陶營勇丁潰逃入陝派兵彈壓各一摺陶茂林營勇潰散情形昨已據聯捷馳奏茲據劉蓉奏稱該潰勇等推副將高選清爲統領沿途搶掠竄近寶雞縣境分股竄至盤屋縣之啞柏鎮一帶並有由鳳翔城外零星東竄者該潰勇等聚眾至六七千人甘心叛亂必將一意東趨擾及完善若不及早撲滅必致蔓延爲患劉蓉已派遊擊王守基等軍馳赴寶雞盤屋等處相機籌辦著卽督飭各軍實力堵扼剿撫兼施將脅從之人分別遣散南山一帶最易藏奸若令該匪竄入剿

辦又形棘手劉蓉務當添派兵勇擇要扼截毋令賊蹤闖入楊岳
斌旣抵陝省卽著督率親軍先將此股潰勇迎頭截擊並催齊後
起之勇到陝分路布置妥籌勦辦聯捷所帶之馬隊亦可由該督
商同調派總須將此起潰勇趕緊就地殲除斷不可令其竄入鄰
疆釀成大患前因直東軍情緊要諭令楊岳斌移師會勦見在陝
西潰勇亟須勦辦著該督卽將此事辦結後再行候旨遵行蔣凝
學一軍如已行近陝境卽由該督飭令隨同征勦以厚兵力其甘
肅兩當縣境內亦有潰勇二千餘人滋擾並著楊岳斌等就近撥
軍扼勦仍飛咨雷正綰曹克忠分兵截擊毋令與前股勾結續行
東竄將此由六百里各諭令知之○予陝西陣亡遊擊舒經畚等
祭葬世職○庚子 上詣 大高殿祈雨○諭軍機大臣等國瑞
奏偵探連日賊情將馬步兵勇分紮營盤一摺逆匪自竄入河套

後仍盤踞紅川口一帶邊馬時在鄆鉅曹州打糧國瑞前派諾林丕勒等管帶見有馬隊又派營總達爾濟由濟甯選帶招集到營馬隊四百名赴曹州會合陳國瑞等步隊著卽催齊詹啟綸宋慶兩軍相度地宜妥慎安營力圖進剿吳棠派來礮船五十隻已到濟甯運河國瑞派員往汶上東平驗看水勢已飭令趙三元等駛赴戴村壩安山等處實力巡防張秋一帶黃運交匯之處尤爲緊要此項礮船恐尙不敷分布著劉長佑閻敬銘各就見有兵力聯集民團扼要守禦嚴密梭巡毋稍大意吳棠仍當續派輕利礮船交黃翼升等帶赴東境交劉長佑閻敬銘擇要布置以資控扼郭寶昌帶領布隊隨僧格林沁剿賊不能護持主將獨以身免且從前係陳國瑞部將輒敢有誣陷陳國瑞之事其居心殊不可問著陳國瑞卽將該革員拏解濟南交閻敬銘審辦與前日拏問之成

保一併嚴訊定擬具奏毋稍瞻徇陳國瑞打仗勇往屢立戰功前此被人陷害經朝廷鑒察曲爲保全此次曹州之敗復加恩免其置議並令統帶郭寶昌所部兵勇該總兵自必能感恩圖報盡殄逆氛渥膺懋賞惟軍威新挫總須養足銳氣方可進剿斷不可恃勇輕進急於圖功每遇軍情事宜與人商辦均須和衷共濟勉之慎之劉銘傳已由單縣拔營是否已抵汶上濟甯一帶總須繞赴北路遏截賊氛以固畿疆仍須續調全部勇丁由周盛波管帶分起赴東合併一處以厚兵力更操勝算國瑞見在收集馬步各隊其有若干務須詳細分別開單註明何項隊伍迅速奏聞不准稍涉含混豫爲將來冒銷地步將此由六百里諭知國瑞劉長佑吳棠閣敬銘並傳諭劉銘傳陳國瑞知之○諭前因北路防剿喫重諭令阜保特普欽於吉林黑龍江挑選馬隊各五百名又據醇郡

王奏神機營所練馬隊不敷派撥復諭令續調馬隊各五百名茲據國瑞奏稱吉林黑龍江近來派出官兵多以西丹充數黑龍江所派西丹技藝雖屬生疏乘騎尙稱熟習吉林所派西丹在本處俱係種地不善馳驟河南已經調到之兵未見得力傷亡逾半詢之在營吉林黑龍江員弁據稱本處食餉官兵尙敷選派等語直東軍情緊要必須得力勁旅前來協助方足以利攻剿而殄寇氛著阜保特普欽將先後所調馬隊選擇食餉官兵久經操練技藝嫺熟者如數挑齊懷遵疊次諭旨分別派赴京師及直隸軍營毋得以西丹老弱充數將此由六百里各諭令知之○諭吳昌壽奏探明統兵大臣陣亡見飭河北將弁嚴扼邊防一摺所陳僧格林沁在曹州城西失利陣亡情形與國瑞等疊次奏報大略相同吳昌壽見因河防喫緊飛檄河北鎮道會同湯聘珍崔廷桂等軍力

扼龍門口並分兵扼紮上下游與直省大名防兵聯絡遏賊偷渡
布置尙屬周妥惟直東兩省河身綿亙數百里幾於防不勝防東
豫毗連之考城處所僅有宋慶張曜等軍扼紮兵力較單亟應籌
添勁旅以資捍禦著官文懌遵前旨迅飭姜玉順統帶所部九營
星速赴豫會同吳昌壽所帶楚軍嚴扼河防如豫境防務漸鬆姜
玉順一軍應否飭赴直東交界地方防剿卽由吳昌壽妥籌辦理
僧格林沁軍營逃潰馬步兵勇絡繹奔赴豫省恐有奸宄潛迹其
中該親王部下桂錫楨一起馬勇本係降眾近日更恐與賊聯爲
一氣假借官軍名目貽害地方著吳昌壽遴派得力武職精細明
幹大員分投盤查妥爲安置毋任爲逆匪煽惑致滋擾害河南省
城防務及沿河要隘仍著吳昌壽督飭湯聘珍等軍及地方文武
嚴密籌防毋稍疏懈吳昌壽請飭直東督撫聯集民團扼守河干

並接濟陳國瑞軍餉已諭令劉長佑圖敬銘迅辦矣將此由六百
里各諭令知之○以救護主帥不力革山東軍營總兵官郭寶昌
職並逮問○調察哈爾馬隊一千赴山東軍營○辛丑諭內閣吏
部奏遵議巡撫藩司處分請將閻敬銘丁寶楨均降三級調用等
語閻敬銘丁寶楨於髮捻竄擾所轄境內未能助剿以致督師重
臣力竭捐軀咎實難辭惟念該撫藩等均在東昌東平等處分帶
兵勇駐紮一時救援不及情尚可原閻敬銘著加恩改爲革職留
任丁寶楨本有革職畱任處分著降爲四品頂帶仍留布政使任
○諭軍機大臣等許彭壽潘祖蔭奏請飭江蘇巡撫解落地開花
礮並揀諳悉製造火器之員由輪船北上一摺本日據軍機大臣
呈遞崇厚給總理各國事務衙門信函內稱見帶洋槍隊赴景州
技藝陣勢尙稱嫻熟以之戰守可望得力見籌破賊之方惟外國

所製之開花礮尤爲制勝聞戈登助剿時所練洋槍隊上海尙有
千名請飭江蘇巡撫查明調派戈登雖去仍可邀外國人幫同統
領等語見在賊勢鸚張如其銳意北犯以未經行陣之戰兵當飄
忽無常之悍寇辦理毫無把握疊經諭令李鴻章派隊北來諒已
認真籌辦著卽查明戈登所練洋槍各隊尙有若干酌量派撥迅
卽由輪船赴津並將落地開花礮多爲籌備一併由輪船帶來其
帶隊洋人應否酌派數員隨同內地將弁管帶如令其前來必須
妥籌章程覈定餉項以免臨時藉口事後要挾等弊丁日昌能否
令其北上如該員不能離滬卽另派妥員帶領熟諳製造火器之
匠役數人趕緊前來該撫一面籌畫調派一面奏聞毋稍延緩至
崇厚信函所稱英國總管句得斯願意隨征因畿南距津較遠該
營總見管理海口礮臺須奉該國公使諭派方可前往等情已諭

令總理各國事務衙門相機辦理矣該營總既情殷報效崇厚不妨令其赴營隨時教練如需外國幫同帶隊員弁亦句令其酌帶若干從前吉必勳葛奈隨征威縣等處曾經立功得邀懋賞崇厚當仿照從前成案辦理並傳知該營總等恪遵營規隨同防剿俟直東一律肅清定加賞賚至應如何籠絡鈴制之處該侍郎自應權宜辦理見在該侍郎曾否到營與劉長佑晤商防剿之策東省賊情若何並著隨時確探奏聞以慰馳繫將此由六百里各諭令知之○諭有人奏統兵大員養賊貽患請嚴行懲辦一摺據稱總兵張曜統帶重兵從未與賊接仗上年十二月閒僧格林沁在寶豐擊賊獲勝張曜統兵二萬有餘並不進剿遂使賊氛復熾由魯山竄擾襄城鄆陵一帶流入山東致僧格林沁力戰捐軀所帶兵勇到處搶掠請飭查辦等語張曜在河南帶兵不能得力疊經被

人奏參昨有人奏稱該總兵爲將弁中之錚錚者其說未知孰是張曜是否擁兵不進縱勇搶掠貽誤戎機著吳昌壽確切查明據實具奏吳昌壽到任未久無所用其回護見在該總兵與宋慶等軍扼紮考城該處兵力甚單該總兵如果居心巧猾實有遷延貽誤情事該撫一面奏參一面另派得力大員前往接替如張曜尙能得力該撫亦不必因有人奏參致有先入之見原摺著鈔給閱看將此諭令知之○諭閻敬銘奏見在賊勢屯踞情形請添撥重兵速防東北並調劉銘傳等由韓莊北來各摺片該逆仍在范縣之羅家樓南至濮州之紅川口東至鄆境之水堡集縱橫延蔓百數十里之間聞已築圩土匪半多響應句結已成將圖久踞若徧距鄆鉅范濮之地則南走豫境北窺東昌東伺濟甯西犯開東實有防不勝防之慮閻敬銘布置省垣犄角定見擬赴東平汶上濟甯

與丁寶楨一軍聯絡嚴防惟勇數太單不敷分布著吳棠卽催令張樹珊分撥三四營迅赴東平汶上一帶歸閻敬銘調遣其嶧縣韓莊以南兼須有兵駐紮以防清淮一路劉銘傳仍懍遵疊次諭旨設法繞出賊前扼要堵截其周盛波全部勇丁並著劉長佑催令陸續起程繞赴濟甯汶上一帶與劉銘傳合軍一處以厚兵力曹州兵力漸厚陳國瑞能否馳赴濟甯與國瑞合紮一處並著酌度情形辦理濟甯一帶防務著國瑞妥籌布置黃翼升礮船十餘隻駛至濟甯因運河水淺阻礙不靈尙須陸軍防護東省既有礮划運掉較便著閻敬銘擇要分撥黃運兼防以期萬全無失大名一帶防務劉長佑仍當嚴密布置不可稍涉大意閻敬銘另片奏請調楊飛熊帶兵助剿等語著官文飛飭副將楊飛熊統帶一二營籌給行糧星夜赴東聽候閻敬銘調遣姜玉順九營並著催令

速進將此由六百里諭知官文國瑞劉長佑吳棠閻敬銘並傳諭
劉銘傳陳國瑞知之○諭曾國藩奏遵旨覆陳霆營潰勇及籌辦
東豫捻匪情形婁雲慶一軍實係因飢生變見查金口兵潰原委
各摺片婁雲慶一軍在上杭城外糧絕而譁幸江西隨發銀六萬
兩飢軍可免決裂金口叛勇見調劉聯捷等軍分路嚴防布置尙
爲妥速卽著督飭派出各軍嚴密防禦毋令再滋事端所籌東豫
髮捻情形該大臣具奏此摺自係尙未接奉僧格林沁陣亡後續
寄諭旨見在該逆盤踞鉅野鄆城一軍與河套之匪互相勾結匪
勢披猖北路軍情萬緊著曾國藩懍遵疊次諭旨剋日統帶親軍
兼程北上先就直東見有兵力妥籌調度以固畿輔藩籬所稱水
師礮船不宜用於岸高河窄之地清江至濟甯七百餘里河道久
淤自臺莊迤北隄岸愈高河面愈狹僅容一舟牖口斗險必須多

人較車而上水師斷難施展等語朝廷亦以河路淺窄疊經調撥輕利礮船藉資協剿吳棠所派礮船五十號已到濟甯運河業經國瑞調赴戴村壩等處扼守嗣後應否再行續調之處仍著曾國藩相度地宜妥爲調度黃翼升彭玉麟等軍見應駐紮何處扼要堵剿並著統籌全局相機布置剿辦此股賊匪自以設法四面合兵圍攻聚而殲之爲上策否則如該大臣所稱偪賊北竄不如讓出運河之西驅回皖豫之界剿辦較易爲力亦合機宜惟見在賊情與前迥異畿南一帶防務萬分喫緊直東等省見有兵力甚形單薄劉銘傳一軍雖已行抵單縣而匪眾兵單亦尙不敷抵禦天津所練洋槍隊千五百名已由崇厚帶赴景州駐紮本日復寄諭李鴻章令將上海所練洋槍隊並落地開花礮酌量由海道赴津以期迅速曾國藩節制直東豫三省督辦剿匪事宜責無旁貸務

當星速過行調度指揮迅殲醜類力固北路之防將此由六百里諭令知之○諭廣鳳奎昌奏籌辦內遷舊服蒙古並驅逐卡內潛居哈薩克酌量時勢權宜辦理一摺科布多所屬之阿勒坦淖爾烏梁海游牧地方見已照依議單被俄人分去前經諭令明誼等如該蒙古部落中有真心內附者亟應擇地移於卡內住牧茲據廣鳳等詢據該蒙古總管莽岱等聲稱阿勒坦淖爾烏梁海兩旗人丁均係舊屬懇准全行移入卡內住牧廣鳳等以此項蒙古人數眾多若全令移於卡內不獨難於擇地安置且於互換信約不符復飭司員等向該總管剴切開導講譯利害該總管及兩旗人丁見均允從仍在卡外住牧並令將應進貢皮暫行停止係因豫防邊患隨時制宜均著照所擬妥爲辦理其阿勒坦烏梁海游牧內潛居之哈薩克人等見有搶劫牲畜各情勢殊狡悍著廣鳳奎

昌選派弁兵嚴密防範毋任滋生事端並著咨明塔爾巴哈台參贊大臣一俟西路軍務稍鬆卽行揀派妥員帶領哈薩克公阿濟會同廣鳳等所派曉事員弁前赴阿勒台烏梁海遊牧地方籌度時勢將此項潛居之哈薩克等分別驅逐撫輯以靖邊圉此次內遷舊服蒙古外逐潛居哈薩克因與大局窒礙姑照所擬權宜辦理嗣後有無別項情節仍著廣鳳等隨時稽查奏聞將此各諭令知之○諭滿慶等奏披楞聲言借路赴藏與布魯克巴構兵見籌辦理情形一摺披楞欲假道布魯克巴赴藏貿易傳教已將布屬之甲昔巴桑卡棟桑等處地方占奪兩家交戰各多傷亡雖係蠻觸相爭惟哲孟雄布魯克巴皆爲西藏南方屏蔽布魯克巴既有與披楞構兵之事藏屬邊防必須豫籌布置滿慶等已責成江孜戴琿並附近邊界各營官以派兵赴瞻對爲名調集土兵操練卽

著認真訓練嚴密布防不可稍涉張皇致動外夷猜忌其布魯克巴欲求唐古特於兵目財帛三項內幫助一項以禦披楞及披楞頭目稟稱欲借路赴藏各情亦經滿慶等詳細指示達賴喇嘛妥辦究係如何辦理之處陳奏殊未清晰披楞卽係英國雖與中國相安而唐古特番眾又不願彼國之人至藏貿易傳教是巴屬求助披楞赴藏兩事均屬窒礙該大臣等務須細心斟酌妥籌至善卽將辦理之法備細奏聞景紋久已有旨飭令赴藏任事如已抵藏卽著與滿慶恩慶會商妥辦將此各諭令知之○壬寅諭內閣御史劉秉厚奏籌餉當用權宜以濟時急一摺所奏實屬非是軍興以來需餉浩繁不得已藉捐輸以資接濟疊經各直省督撫將捐輸助餉之案奏請獎勵可見紳民中急公好義情殷報效者原不乏人朝廷方以民力艱難時深廛念惟冀軍務早日平定捐輸

即可早日停止若如該御史所奏令各省紳民人等自十萬以至百萬之家或十分而取其一或二十而取其一優給獎敘酌予世職日後由戶部具呈領還數百萬之餉可計日而儲等語儻照此辦理必致紛紛擾累弊竇叢生且亦無此政體所奏斷不可行○諭軍機大臣等李瀚章奏派軍堵剿霆營叛卒並西路各軍收復天柱縣城一摺孫長紱奏霆營未可調粵及義甯兵團截擊潰勇疊勝各摺片霆營叛勇由鄂東趨因湖南平江業經戒備卽由通城等處竄入江西義甯州境經該處兵團迎頭截擊疊獲勝仗該逆敗回銅鼓營邊界剿辦尙屬出力銅鼓營爲江西湖南交界之區據李瀚章奏稱已派趙煥聯等扼要駐紮足遏賊衝卽著督飭派出各軍會同江西官軍兩面夾擊官文仍飭成大吉等督兵跟追合剿毋令回竄鄂疆此起叛勇數旬之內裹脅至二三萬人且

有僞指揮檢點名目是其甘心叛逆實爲法所難貸官文李瀚章
孫長紱務當督率各軍乘賊氛初起之時迅速撲滅毋得稍分畛
域致成蔓延援閩霆營眾心未固萬無再令赴粵之理孫長紱所
解餉銀六萬是否已經勻放近日該營軍心若何孫長紱當籌畫
餉銀陸續籌解毋令再因飢餓逃潰鮑超疊經有旨嚴催令其速
赴鄂省將潰勇一事迅速辦理著懍遵疊次諭旨星夜兼程東下
招集舊部率赴江西分別勦撫力贖前愆儻敢稍涉遲延貽誤軍
事恐鮑超不能當此重咎也天柱縣城失陷經周洪印等率兵進
規賊匪宵遁遂將縣城收復在事員弁尙屬著有微勞著李瀚章
秉公酌保不得稍涉冒濫至逸出各匪勞崇光張亮基當飭副將
吳勝金等實力搜捕毋令餘燼復燃李瀚章仍檄周洪印等酌撥
兵勇分布要隘以固疆圉將此由六百里諭知官文勞崇光張亮

基李瀚章並傳諭鮑超孫長紱知之○撥江海關稅銀二十萬兩
濟曾國藩軍餉○癸卯諭軍機大臣等劉長佑奏賊匪盤踞句結
時圖竄渡必須添調重兵嚴扼北犯一摺據稱逆匪大股見在鄆
城荷澤鉅野及濮范沿河一帶周圍數百里盤踞句結時圖竄渡
又探有破伐樹株搬運櫟木排造船筏之事種種詭譎情形不可
殫述等語逆匪蓄意北渡雖經劉長佑沿河布置賊來窺伺屢經
擊退惟防兵尙單儻大股麇集數路並進卽有難以策應之勢自
應厚集兵力先固藩籬陳國瑞前已令其馳赴濟甯第濟甯兵力
漸集且曹州距東明長垣甚近較赴濟尤形便捷卽著陳國瑞迅
帶所部前赴劉長佑軍營聽候調遣藉壯聲威曹州府城著國瑞
閻敬銘調撥兵勇妥籌兼顧至劉銘傳一軍疊經有旨諭令迅赴
濟甯汶上助剿此時賊思北竄後路尤應有追躡之兵著仍遵前

旨迅速拔營前進於濟甯汶上一帶或張秋鎮扼要地方實力扼守相機進剿卽著閻敬銘劉長佑飛速催提到防後卽行具奏該提督如再遲延卽著嚴參懲辦賊旣於蘆葦深處覓搶船隻則黃河之險與我共之非多集水師船隻分段扼截不足以遏賊氛劉長佑見覓船十數隻練習開礮恐尙不敷分布著再添籌船隻與北岸陸軍犄角嚴防以資得力閻敬銘於防河船隻並未籌添設令賊匪偵知無備駛赴下游一帶北渡震動畿疆該撫自問當得何罪著將省城守禦布置一定卽赴濟汶等處將黃運兩河防守並添造礮船事宜妥籌辦理並與劉銘傳丁寶楨等軍嚴密扼防其張樹珊一軍及周盛波全部仍著喬松年吳棠催令赴東省以厚兵力見在賊氛正盛必須壁壘一新謀定後戰方能重振軍聲劉銘傳陳國瑞務當穩慎圖功毋稍輕進浪戰致有挫失詹啟綸

一軍仍著國瑞催令前進至張曜宋慶等軍如能越境會剿既可杜賊竄豫之路又可與直東各軍兩面夾擊並著吳昌壽斟酌情形妥籌調派不得稍分畛域直東軍務喫緊曾國藩務當恪遵疊次諭旨星夜北來督兵剿賊以副委任該大臣如因陸路行走遲滯或航海前來尤形捷速著曾國藩斟酌妥辦如業已起程則毋庸議上海所練洋槍隊並落地開花礮仍著李鴻章迅速調集由海赴津毋稍遲誤徐宿一帶防軍陸續北調該處防守亦不可令其空虛著吳棠喬松年豫籌調派扼要設防將此由六百里諭知曾國藩國瑞劉長佑吳棠李鴻章喬松年閻敬銘吳昌壽並傳諭劉銘傳陳國瑞知之○諭德興阿奏甘省潰勇東犯陝境暨請飭聯捷暫駐陝省各摺片此項潰勇經劉蓉派令彭體道前往招撫該潰勇要求路票需索欠餉種種刁難見已趨至鄠縣迤東連夜

舉放號火居民驚惶逃避距省城僅七十里亟應迅圖剿辦以伐
狡謀前因劉蓉奏該潰勇甘心叛亂一意東趨曾經嚴諭該撫派
兵實力扼堵並將脅從之人分別遣散見在勇眾已近省垣劉蓉
並不亟思堵剿輒令其在城西牛洞梁家橋等處地方就撫是其
臨事毫無布置有希圖了事之心無論該潰勇設謀兇狡不肯甘
心就撫卽令詭詞馴順仍復肆意句結必致蔓延爲患貽害鄰封
該撫自問其能當此重咎耶著劉蓉懍遵前旨飭令派出之王守
基等分路兜擊實力剿辦如實係脅從之眾一經懲創卽肯將軍
械馬匹呈繳者自不妨分別遣散以施法外之仁其省城防守事
宜卽著都興阿實力防維毋稍疏懈聯捷見駐陝西省垣楊岳斌
身任兼圻尤屬責無旁貸著卽整頓隊伍會同劉蓉所派員弁合
力進擊將不法潰勇盡力殄除以靖地方將此由六百里各諭令

知之○諭楊能格奏慶陽糧臺存餉撥解罄盡各省協餉無期請飭酌撥兩淮鹽課江海關稅課一摺甘省兵數日增餉源日竭雖經諭令四川河南山東山西等省按月撥解仍屬不敷都興阿一軍見在進攻甯夏雷正綰等軍於攻克黑城鹽茶後進攻預望勒辦正在喫緊必須士飽馬騰方能迅速蒞事著曾國藩李鴻章劉卣膏於兩淮鹽課江海關稅課項下查照從前協撥甘餉之數籌銀各數十萬兩趕緊陸續撥解並於五六月間先籌銀二十萬兩分作兩批迅解慶陽糧臺以應急需毋稍延緩將此由五百里諭知曾國藩李鴻章並傳諭劉卣膏知之○江南將軍富明阿到京命管神機營事○甲辰諭軍機大臣等國瑞奏請添募勇丁剿賊並請將陳國瑞一軍仍歸調遣請令張樹聲等全隊移紮汶東並收集馬步兵勇大概數目各摺片賊匪仍在鄆鉅一帶盤旋時圖

竄犯北路昨因直隸兵力甚單諭令陳國瑞迅帶所部卽日赴劉長佑軍營令劉銘傳一軍於濟甯汶上一帶或張秋鎮扼守著國瑞劉長佑間敬銘懷遵昨日寄諭卽飛飭陳國瑞一軍統帶全部赴直仍歸劉長佑調遣相機防剿力顧北路至山東地方有收集馬步兵勇數千名並劉銘傳一軍詹啟綸一軍又續調之周盛波張樹聲等軍豈尙不敷調遣陳國瑞由曹考一帶赴劉長佑大名軍營其勢甚便兼可爲畿疆保衛至所稱此時若有一隊集齊或有一軍可恃卽親督進剿似難俟休養之兵心大定訓練之技藝精熟再行緩力圖功漸回大局等語朝廷豈不知賊氛甚惡亟宜剿除以清腹地惟國瑞自度新集潰散之卒遠來疲乏之師能當此兇饒方張之寇否若一意進剿勢必驅之北犯國瑞其能當此重咎耶爲今之計止宜養精蓄銳各守本境毋令四出滋擾或閒

出輕銳奇兵多方牽制俟曾國藩大軍齊集四面布置周妥漸偪漸緊可以聚而殲旃否則俟劉銘傳到後會商進剿謀定後動以期萬全無失其募勇助剿一節尤須慎重恐有奸匪溷迹不可不慎之又慎所招潰散馬步恐數目尙有虛報必須切實稽察嚴加甄覈張樹聲等軍前已令吳棠酌撥三四營赴東國瑞請以全隊就近移紮汶東一帶嚴防運河著吳棠酌度調派以資得力劉銘傳一軍於僧格林沁未經挫敗之先卽已調令北來何以初八日始由徐州起程究竟已抵何處著卽飛速前進赴汶上濟甯一帶相機防剿如再遲延定當重治其罪不稍寬貸黃運河防均屬緊要劉長佑聞敬銘當懷遵疊次諭旨妥籌防範務將渡船提禁淨絕並嚴防本境伏賊暗通消息不可稍涉大意本日御史陳廷經奏保員辦理直隸團練一摺已明降諭旨將賈臻等交劉長佑差

委該督當督率地方公正官紳妥爲經理以輔兵力之不足毋得有名無實徒滋擾累正在寄諭間據吳棠奏請調黃開榜赴營一招見在霆營潰勇竄擾江西銅鼓營等處黃開榜督帶兵勇赴瑞州一帶勦辦正當喫緊未便令其北來至淮徐兵單疊經諭令李鴻章力籌調派著吳棠仍卽咨商李鴻章迅派得力兵弁馳赴淮徐一帶防守喻俊明水師准其暫畱桃宿鎮撫吳棠另片奏挑選水勇二百名整理大礮五十位由濟甯馳赴直隸等語著劉長佑派員迎提並趕緊豫備船隻俟此項礮勇到齊卽行酌量配帶以資防禦將此由六百里諭知國瑞劉長佑吳棠閻敬銘並傳諭劉銘傳陳國瑞知之○以救護主帥不力革山東軍營副都統常興阿職撤勇號溫德勒克西高福富森保分別嚴議議處革護軍參領奎祥等升銜均畱營戴罪效力○乙巳諭內閣前因刑部遵議

定擬已革臬司李元度罪名當降旨發往軍臺效力贖罪嗣據沈葆楨李鴻章奏該員罪不掩功且母已七旬家無次子懇恩免其發遣復交部再行覈議具奏茲據奏稱李元度係軍務獲咎例不准其援免該部執法辦理未便准行可否免遣之處請旨定奪等語李元度前在湖北江西捏報克復城池革職後復徇索軍餉不顧大局本屬咎無可貸惟念該革員前次尚有可錄之功且係老母孤子例得畱養近據李瀚章奏該革員在平江本籍堵剿叛卒逆蹤不敢入境岳屬得保無事皆該革員集勇敏速布置周備之力亦不無微勞足錄李元度著加恩免其發遣並免交臺費銀兩○予故左副都御史張芾建祠徽州提督周天受訓導李應詔附祀○丙午諭軍機大臣等李鴻章奏籌辦大概情形並密陳防剿機宜各摺片據稱該撫所部諸軍分防蘇境三萬餘人水師居多

不能遠調陸師僅劉秉璋潘鼎新兩軍各十營王永勝劉士奇等十七營曾國藩若再商調似亦不能多派等語見在賊眾屯聚濮范鄆鉅一帶蔓延開東長境內數百里間一片賊氛劉銘傳及張樹聲周盛波三軍雖有一萬七千餘人然合之一面則見其多分之數百里間則見其少賊匪見於黃河南岸砍伐樹株編造木筏又於蘆葦深處覓搶船隻蓄意渡河北犯直東沿河一帶地廣兵單防剿甚形喫緊李鴻章仍當先其所急多派勇丁聽候曾國藩調遣不得稍分畛域直東豫三省前已有旨諭令該地方官興辦團練惟堅壁清野之舉亦非一時所能猝辦自應厚集兵力方足以利攻剿著李鴻章仍遵前旨迅即多派兵勇洋槍各隊並攜帶開花炸礮由海北上或由膠州登岸或由天津登岸前赴直東一帶防剿不准再事遷延致誤大局開花礮質雖笨重仍可由黃運

兩河運載軍營應用並著該撫迅由海道運解天津以備直東軍營急需李鴻章所稱請於久在軍營帶勇著有成效文員中慎選擢用督撫不爲無見意亦必有所指卽著李鴻章將平日知之有素緩急可恃者不拘官階酌量保奏以備朝廷採擇擢用該撫旣經兼署兩江督篆所有應辦事宜自當隨時會商曾國藩悉心經理其通商大臣關防卽著帶往江甯將此由六百里諭令知之○諭吳昌壽奏出省馳赴河北扼要嚴防並請飭崇厚駐紮齊河各摺片所陳賊竄曹郡之羅口地方分股擾及濮鄆脅從民寨十餘處紮筏造船意圖北渡與前日劉長佑所奏情形大略相同該撫見已督帶譚仁芳等四營出省由封邱至滑濬一路親履河干察看勘地勢分別戰守所籌尙屬周妥卽著飭令派出各軍及河北鎮道調集兵勇實力嚴防以顧北面藩籬並可與直東各軍聯絡聲

勢會同防剿以期殄此巨寇其考城蘭儀防剿事宜卽責成張曜
宋慶蔣希夷等合力固守該處距東境較近總須嚴飭該將士不
分畛域以剿爲防於剿辦方有裨益仍著吳昌壽遵奉前旨妥籌
調派如果賊勢西趨該撫卽抽調勁旅回顧省防相機截剿以杜
逆蹤紛竄黃河北徙之後綿亘河南直隸山東地面北岸渡口豫
省封邱所屬之尙店已由吳昌壽派令湯聘珍等兵勇扼守直隸
山東河岸綿長雖經劉長佑閻敬銘等調派兵勇分段設防誠恐
賊匪乘隙偷渡圖逞狡謀仍著該督等懷遵疊次諭旨趕緊添造
船隻演放槍礮無分晝夜梭織巡查一面嚴飭沿河兵勇民團遇
有形迹可疑之人認真盤詰毋令奸宄溷迹偷渡前諭崇厚統帶
洋槍隊駐紮景州以固畿南之防吳昌壽請令該侍郎駐紮齊河
自係爲遠防不如近剿起見著該侍郎斟酌情形慎籌進止如劉

長佑所派駐防景州之兵足敷扼剿崇厚亦可進紮齊河以重河防均著劉長佑崇厚妥籌具奏將此由六百里各諭令知之○諭官文奏遵旨籌議月協甘餉數目並謀勝左右兩營勇丁索餉滋開分別懲辦各一摺前因曾國藩奏稱甘肅之餉應責成江蘇江西浙江湖北等四省籌解當經諭令各該督撫等將每月能各接濟甘餉若干之處速行覆奏茲據官文奏稱該督督飭省局司道竭力籌措每月除撥解蔣凝學一軍舊欠外仍按月再籌銀三萬五千兩解交甘省等語見在甘肅軍務正當喫緊楊岳斌一軍人數較多需款尤鉅自應寬爲撥解以濟要需卽著照官文所議每月除撥還蔣凝學一軍舊欠二萬兩外按月再籌銀三萬五千兩派員解至甘省交楊岳斌軍營分撥接濟並著將協濟甘省軍裝軍火等項一併解交楊岳斌轉撥各營以歸畫一經此次議定章

程之後該督務當督飭局員按月源源籌解不准稍有帶欠致干重咎總兵李成謀所統謀勝左右兩營勇丁索餉滋鬧砍傷弁兵並敢邀約馬步各營幫同鬧餉情殊可惡亟應嚴行懲辦以肅軍律惟念該總兵先因追剿霆營叛勇未及約束於前回軍後即能設法開導分別正法遣散不至驚擾居民辦理尙爲安速李成謀著從寬免其議處該兩營營哨各官或隨同懲辦或身受多傷業經分別責處著一併免其置議仍著官文嚴飭李成謀將前後中三營及馬隊兩營申明紀律勤加訓練儻敢再滋事端卽著嚴參懲辦毋稍姑容將此由五百里諭令知之○丁未諭軍機大臣等國瑞奏髮捻各逆東趨逼近濟甯請飭直隸撥兵防守鹽河閭敬銘奏賊渡運河東竄省防河防均形喫緊崇厚奏馳抵景州分兵屯紮各一摺髮捻大股在鄆城縣屬之水保集紅川口等處麇聚

四出焚擄徧勒民圩勢甚鴟張前股已至安居邊馬由長溝等處
偷渡運河竄至濟甯土圍以外國瑞見與丁寶楨商派副將王心
安等馬步各隊會合趙三元等所帶礮船水陸迎剿小有斬擒該
逆旋即退回數里見在運河西岸賊蹤蔓延數十里濟甯防守甚
屬喫緊聞敬銘所稱賊由汶上開河以北搶渡運河邊馬已至甯
陽西南滋陽西北大股亦即蜂至等情是兗州泰安屬境又有賊
蹤滋擾該匪非由甯陽趨泰安長清之路直撲省城卽恐由東阿
長清窺伺大清河北岸是省垣及張秋以東鹽河一帶又屬萬分
喫緊著國瑞督率見有兵勇與丁寶楨所部嚴守濟甯力扼運河
東岸不得以水淺爲詞任聽大股匪眾續行搶渡汶上滋陽一帶
亦著聞敬銘責成地方文武聯絡紳團分布兵勇力籌堵扼並嚴
設省防以固根本力顧鹽河口岸遏賊北渡毋稍疏虞劉銘傳前

已屢有寄諭催令迅赴濟甯汶上一帶防剿該提督竟任意遷延遲至本月初八日始由徐州起程殊堪痛恨著先行交部議處並著迅帶所部全軍星夜兼程繞由濟甯汶上以北偏向西南截剿儻再一味疲玩致誤大局必當重治其罪懷之愼之詹啟綸一軍仍著國瑞閻敬銘飛檄嚴催剋日馳赴濟甯如再延誤卽著國瑞閻敬銘嚴參丁寶楨俟詹啟綸到濟甯後卽帶所部回赴濟南泰一帶相機防堵陳國瑞一軍前已屢諭改赴劉長佑軍營著懷遵前旨統帶所部馬步各營卽日由開州東明一帶渡黃北上統赴直隸大名軍營歸劉長佑調遣至黃河北岸自張秋以東縣長數百里水淺岸窄處處可虞東省兵力空虚情形異常危險如濮范一帶賊蹤合股東竄劉長佑卽當分飭所部於沿河合力夾擊或飭令陳國瑞一軍於渡黃北上時移防張秋以東沿河口岸以

固直邊防總以布置迅速毋分畛域是爲至要周森藻所帶礮
划卽著閻敬銘嚴飭遊駛巡防仍恐不敷應用該撫務須添籌船
礮力圖防河不得稍存玩忽自干咎戾昨有旨令崇厚酌量情形
相機進紮齊河此時東省鹽河一帶空虚著該侍郎酌度情形統
帶洋槍隊速赴齊河北岸防守並與該處紳團聯絡聲勢兼顧西
面張秋一帶毋稍疏虞前經屢諭李鴻章多撥援師由海道北上
見在直東情形緊要如此著該撫懍遵前旨剋日撥兵起程不必
等候曾國藩檄調以致遷延時日貽誤大局曾國藩亦當趕緊起
程星速北上以慰廑盼蔣凝學一軍本日據楊岳斌奏有令其取
道豫省赴陝之語此軍計見在未離豫省著吳昌壽迅卽檄令該
道員迅速移營由豫赴直卽著劉長佑飛速迎提到時酌派防守
沿河要隘以厚兵力本日並諭令楊岳斌一體知照矣姜玉順一

軍並著官文迅飭起程赴豫歸吳昌壽調遣不得遲延觀望將此
由六百里諭知官文曾國藩國瑞劉長佑李鴻章吳昌壽閻敬銘
崇厚並傳諭劉銘傳陳國瑞知之○左宗棠徐宗幹奏漳州踞逆
勢尙負隅連日郭松林楊鼎勳等軍偪紮漳南大獲勝仗其王德
榜一軍扼紮漳北擊退撲營悍賊擒斬甚多李逆侍賢經官軍疊
次擊敗勢日窮蹙圖由漳北小路繞犯安溪以鈔官軍後路其計
未成又圖勾結同安土匪內訌滋事經郭松林等將各鄉匪巢洗
蕩其灣泊海面匪船百餘隻亦經候選知府葉文瀾焚毀狡謀益
無所施見在汪逆亦由奎洋敗竄梅林各逆麇聚一隅其勢斷難
久踞必仍思乘間突出爲苟延殘喘之計漳州東南兩路局勢漸
臻穩固東北一路兵力稍單臣等已飭福甯鎮總兵劉明燈等五
營馳赴安溪華對一帶防勦當可與劉清亮王德榜兩軍就近聯

絡惟西路及西南一路遠防之師有王開琳湘營七千餘人駐紮永定廣東方耀等軍駐紮饒平大埔近剿之師則必須俟龍巖永定邊界肅清南靖攻克始可移軍進偁臣宗棠卽出省親赴泉州一帶相機督剿以冀迅掃餘氛 上諭昨據李鴻章奏援閩蘇軍會合浙軍分路進偁於四月二十一日克復漳州府城此次左宗棠等所奏尙是漳州未克以前攻剿情形諒已續有奏報在途漳州之賊經官軍分路兜擊朝廷早慮其乘閒奔逃別圖生計李鴻章摺內有侍逆潛開西門而遁之語是漳州雖經克復而渠魁仍未授首必將與汪逆合謀計圖復逞見在東南兩路局勢旣尙穩固東北一路亦有劉明燈等聯絡扼守而西面之漳浦雲霄詔安平和等城均爲賊踞該逆必思由此路竄走已無疑義粵省饒平大埔一帶雖有方耀等軍防守尙恐兵力不敷分布左宗棠等仍

當分撥勁旅繞赴西路會同粵軍迎頭攔擊杜其竄越之路永定一帶王開琳所部七千餘人防守自尙周密惟婁雲慶一軍業因索餉譁謀旋經折回江西是上杭武平一路未免空虛著左宗棠酌量分兵聯絡王開琳一軍嚴密布置毋令賊蹤偷越總須將此股賊匪就地殲除不得以驅賊出境爲了事仍一面飛咨廣東江西督撫嚴飭派出防軍實力遏截毋稍鬆勁將此由六百里各諭令知之○諭楊岳斌奏暫駐西安候旨遵行一摺捻逆蔓延於濮范鄆鉅之交時圖北竄黃河北岸防守雖經劉長佑等分路布置而兵力尙單不足以制衝突楊岳斌如能親統全軍迅赴直隸會剿自足以迅殄賊氛前因甘省潰勇東犯已至鄆縣地方曾經諭令劉蓉妥籌剿辦並令聯捷暫駐西安會兵進擊見在此起潰勇是否剿滅抑已交械就撫甚深廛繫聯捷所帶之兵僅五百餘

名且器械未齊難資禦敵陝省兵勇大半前赴階州省城兵力無多亦恐不敷截剿著楊岳斌酌量情形如潰勇未能遣散卽畱兵會剿盡力殄除以免顧此失彼之虞如陝省各軍足制潰勇死命卽著親統全軍徑赴直隸會同劉長佑合兵進剿保衛畿疆盡殲醜類該督所部勇丁卽著隨時訓練以期得力將此由六百里諭令知之○戊申諭內閣華豐等奏遵旨會審降調職員供詞不符請飭查覈辦一摺降調翰林院編修蔡壽祺所供各節與劉蓉原奏該員在四川私刻關防調勇招匪等情迥不相符自應確切查明以成信讞著崇實略秉章按照劉蓉原奏及蔡壽祺供詞迅速詳查具奏所有蔡壽祺呈遞親供各件著刑部鈔錄咨行該將軍等據實查覆○曾國藩奏疊奉諭旨飭臣趕緊赴援保衛畿疆臣部署一切擬於月內啟程先赴徐州以該郡爲老營派一良將駐

紮濟甯臣亦當親赴濟甯一帶察看形勢惟僧格林沁以督師重臣猝爾捐軀震遠近之人心長逆賊之兇餒朝廷責臣討賊至切且速卽山東官民亦望臣星速北上臣躊躇再四有萬難迅速者數端請爲我皇上縷晰陳之查臣部金陵未撤之兵僅存十六營人人思歸此次聞有山東之行皆不願北征勸諭三日始定議裁撤者十二營北征者僅四營又新募兩營合三千人作爲隨臣左右之親兵此外劉松山甯國一軍相距較近見已飛檄往調等候劉松山前來如其部卒不願北征臣亦不復相强當酌帶楚軍將弁另募徐州勇丁倣臣處之營制而約束之存楚師之規模開徐兗之風氣李鴻章所部淮勇已稍習於北方矣然尙專食稻米不慣麥麩若徐兗間另出勁旅則北路數省到處相宜臣鑒於金口兵叛之禍不敢强楚勇以遠征見僅劉銘傳周盛波兩軍歸臣

調遣淮勇雖稱勁旅人數尙少不敷分撥不得已爲此迂緩之謀
添募徐方之士約須三四箇月方能訓練成軍此其不能迅速者
一也捻匪積年擄掠戰馬極多此次蒙古馬隊潰散恐亦爲賊所
得見聞賊馬多至萬餘匹馳驟平原其鋒甚銳臣擬在徐州添練
馬隊派員前赴古北口一帶採買戰馬千匹約計往返程途至速
亦須三月加以訓練非再得兩月斷難集事若竟不佐以馬隊而
強驅步兵以當騎賊雖有賁育之勇亦將不戰自靡此其不能迅
速者二也扼賊北竄惟黃河天險最爲可恃防河之策自爲目前
第一要義臣上次摺內卽擬由河南山東撫臣另造三板戰船見
在事機尤緊直隸齊豫三省均須迅速造船分列河閒以壯聲勢
吳棠所奏江南之船於黃河水性不合與臣前奏相符所有斟酌
船式採辦木料招募水勇應由該三省督撫悉心籌畫因地制宜

惟礮位一宗北省較少金陵存留尚多臣擬撥礮三百尊分濟三省派船解至濟甯州由該三省派船前來迎提黃河水師辦成畿輔可永無捻匪之患其事雖緩其利甚大然非有四五月工夫難期就緒此其不能迅速者三也至劉銘傳一軍不宜遽入直隸宜勦賊於黃河以南臣於上次摺內陳明在案茲奉節次諭旨嚴催劉銘傳渡河徑赴劉長佑軍營果使於事有濟自應設法北渡惟目前濮州范縣荷澤鄆城等處黃河南岸一片賊氛若非節節掃蕩焉能衝過北岸若使遠避賊鋒繞路行走則上游須繞至河南蘭儀等處下游須繞至山東歷城長清等處非迂繞五六百里不能徑行渡河且該軍見在南岸尚可遇賊一擊若賊未北渡而該軍先至北岸反置勁旅於無用之地似於軍情地勢均未相宜臣昨接劉銘傳來文批令在魚臺滕縣附近運河之處駐紮擬俟糧

運稍有把握再令進紮濟甯正籌度間接奉諭旨飭劉銘傳由金鄉嘉祥一帶黃河南岸向西兜剿又接國瑞來函亦欲劉銘傳在黃河南岸協剿與臣暫不北渡之說相合以理勢揆之黃河夏秋盛漲劉長佑親統大軍防堵河南該逆應難飛渡不特劉銘傳目下不宜渡黃即將來事勢稍定亦不宜令河南之兵兼顧河北查河北僅有直隸一省近年捻患尙少河南有齊豫蘇皖四省近年捻患極多據臣愚見直隸宜另籌防禦之兵但令分守河岸齊豫蘇皖四省宜另籌追剿之師不使馳援河北蓋楚勇淮勇向係每日僅行四十里黃河水少萬人渡河動逾旬日若令時而北渡時而南渡我則疲於奔命賊則相去已遠殊爲非策此因行軍不能迅速遂不能兼顧直隸者其一端也僧格林沁之忠勇絕倫婦孺皆知其統兵追賊日行七八十里或百餘里不等行走太速勢不

能自帶米糧埋鍋造飯行文州縣令其供支麪飯將士爭先落後
飢飽不均有連日不得一餐者其隊伍難整在此其行軍迅速亦
在此臣處行兵之例每日紮營支帳埋鍋造飯不向州縣索米供
應略師古法日行僅四十里少或二三十里李鴻章之淮勇亦倣
楚師之法其步步穩妥在此其行軍遲鈍亦在此僧格林沁剿辦
此賊一年以來周歷湖北安徽河南江蘇山東五省若他人接辦
此賊斷不能兼顧五省不特不能至湖北卽齊豫蘇皖四省亦不
能處處兼顧如以徐州爲老營則山東祇能辦兗沂曹濟四府州
而濟東泰臨以北力不逮矣河南祇能辦歸陳兩府而開許南汝
以西力不逮矣江蘇祇能辦淮徐海三府州安徽祇能辦廬鳳潁
泗四府州餘皆力不逮矣此四省十三府州者縱橫千里從古四
戰之場歷年捻匪出沒之區若以此責成督辦之臣而以其餘責

成四省之巡撫則汛地各有專屬庶軍務漸有歸宿此賊已成流寇飄忽靡常宜各練有定之兵乃足制無定之賊此因行軍不能迅速遂不能徧顧各省者又其一端也方今賢帥新隕劇寇甚張山東之望援急於星火而臣策戰事乃在半年以後北路之最重莫如畿輔而臣策直隸乃須另籌防兵此皆駭人聽聞之言殆不免於物議紛騰交章責備然臣籌思累日非專力於擒匪最熟之十三府州不足以弭流寇之禍理合直陳芻蕘備聖主之採擇又奏臣精力頽憊不能再任艱鉅屢經具奏在案近則衰態更增說話至一二十句舌尖卽木強蹇澀不能再說以接見人客爲苦前聞霆營金口潰變之信憂心如焚徹夜不寐近聞賢王鄆城殉節之信益加焦灼寸心無故驚怖更事愈久心膽愈小公事應了之件積壓甚多所部兵勇除霆營及已撤外餘存尙近三萬均屬

強弩之末不堪驅策本日奏疏中所稱專力十三府州者臣自問能言之而不能行之惟有仰懇 天恩另簡知兵大員督辦北路軍務稍寬臣之責任臣願以閒散人員在營效力不敢置身事外忘盡瘁之大義亦不敢久縮兵符自知將致債事而不豫爲一言區區愚忱伏乞 聖慈垂鑒 上諭軍機大臣等前因僧格林沁在曹郡城西殉難北路馬步諸軍總統難得其人是以特簡曾國藩馳赴山東一帶督師勦賊茲據奏稱訓練軍士採買戰馬添造礮船勦辦不能迅速等語統籌全局不亟亟爭旦夕之效大臣謀國算無遺策自應如是惟賊勢方熾近復搶渡運河擾及兗境若徑由張秋一帶渡河而北畿輔不免震驚於大局殊有關繫僧格林沁舊部馬隊尙有千數陳國瑞等步隊亦不下四五千入見雖暫歸國瑞統帶深恐調度不能得力而直東軍情日緊南望實切

殷憂曾國藩當仍遵前旨酌帶親兵迅速起程以副委任徐州扼
南北之衝濟甯州亦直東衝要之所卽著該大臣擇要駐紮以一
事權俾諸軍有所稟承旗綠防兵亦不至散而無紀方爲妥善至
督辦軍務以規畫指揮爲上並不在乎身臨前敵僧格林沁統兵
追賊日行七八十里或百里不等節經諭令該親王持重穩進無
如求效太速視賊太輕以致士馬俱困一敗不振中外震駭曾國
藩謀定後動朝廷並不責令剋日奏功但須權衡緩急趕緊調派
一枝勁旅扼賊北竄以固畿輔門戶其一切應辦事宜悉由該大
臣隨時酌辦直東豫三省文武官員如有不能得力卽由該大臣
隨時奏請更換亦斷不可稍存拘泥之心至山東本省並無得力
之軍足資控制節經諭令劉銘傳繞赴濟甯汶上以北遏截賊蹤
見在賊已搶渡運河張秋一帶尤關緊要著曾國藩速飭劉銘傳

統率所部由魚臺滕縣星速前進力固北路之防毋再延緩至黃運兩河壘經責成劉長佑閻敬銘等嚴密防範第河道紆長該省兵力不敷堵剿曾國藩仍當隨時咨行該督撫等妥籌策應該大臣籌兵籌餉數載以來勤勞備至見值事機孔亟正臣子竭忠報效之時諒不忍以精力稍衰遽辭巨任至所稱剿辦未能迅速不免物議紛騰交章責備等語所奏未免過慮朝廷用人具有灼見且理之是非自有公論豈局外無端之毀譽所能搖惑耶將此由六百里加緊諭令知之○諭前因髮捻各逆竄入東省恐各處土匪乘機竊發曾經密諭盛京熱河等處派兵巡緝近聞盛京吉林所屬地方騎馬賊匪動輒聚集數百人肆行擄掠燒殺村民並於各城附近地方行劫當鋪官兵往往緝賊失利等事是該管文武不能實力緝拏已可概見該將軍等何以並不上聞當此盤查喫

緊之際仍敢狃於積習縱寇養癰儻致蔓延其能當此重咎耶卽著該將軍府尹等據實覆奏一面速派得力弁兵協力兜剿務將此股馬賊悉數擒斬毋得此拏彼竄任其奔逸爲害所轄境內稽查奸宄各事仍懍遵前次諭旨不動聲色嚴密巡防毋稍疏懈吉林地方見在捕緝馬賊查拏土匪挑選馬隊均關緊要所有喀爾喀分界事宜阜保著毋庸前往俟特克慎抵任後卽著該署副都統前往辦理將此由五百里各諭令知之○諭聯捷奏請赴直豫分防黃河並繪具圖說呈覽一摺聯捷所帶馬隊係專派援剿西路之師刻下甘省待援孔亟陶茂林營內潰勇已竄近陝西省垣曾否剿辦肅清抑令其交械就撫著聯捷懍遵疊次諭旨與楊岳斌會籌妥辦一俟將潰勇辦竣仍帶所部西行與成祿等會師進援肅甘疏通關路次第廓清西陲以副委任毋庸赴直東防河轉

致徒勞遠涉緩不濟急楊岳斌仍遵前旨將近省潰勇與劉蓉等會籌辦理如陝省諸軍足資鈐制該督卽統所部取道河南徑赴直隸與劉長佑等會籌布置保衛畿疆將此由五百里各諭令知之○諭傳諭浙江提督鮑超鮑超奏籌備西征並到籍日期一摺所稱招練新軍採買戰馬各事宜非鉅餉不能集事非數月不能成軍前因霆營潰勇竄至江西銅鼓營一帶疊經諭令該提督前赴江西分別招集遣散著仍遵前旨毋庸西進迅卽由湖北至江西探聽潰勇擾及何處卽向何處速籌妥辦此起潰勇就平後仍卽統領婁雲慶所部霆營入閩會剿該提督惟當懷遵歷次寄諭迅速赴江毋稍遲緩干咎○己酉諭內閣吏部等衙門奏遵旨嚴議督剿不力各大員處分一摺上年逆匪竄擾湖北胡廣總督宮文以欽差大臣出省督軍兵力甚厚乃日久毫無成效任令該逆

竄回東豫等省前任河南巡撫張之萬身任封圻吏部左侍郎毛昶熙督辦團練於髮捻竄擾本境徒恃有僧格林沁追逐之師未能督率兵團協同截剿以致賊匪乘虛遠竄貽害鄰疆均屬咎無可辭本應均照部議各降三級調用不准抵銷惟念該督撫等於境內賊匪遠竄他省係因該逆馬隊飄忽致疏防範尙非有心貽誤官文著加恩改爲革職畱任拔去雙眼花翎撤銷太子太保銜以示薄懲張之萬著降爲三品頂帶仍帶革職畱任處分暫畱河東河道總督任毛昶熙著加恩改爲革職畱任○諭軍機大臣等李鴻章奏遵派兵將航海赴津閩敬銘奏賊撲濟甯籌辦省防河防滋陽等境均有賊蹤見擬籌添礮船各摺片李鴻章恐賊北趨震驚畿輔派常鎮道潘鼎新帶所部淮勇十營由海道赴天津實能視國如家顧全大局深堪嘉尙該道卽日雇坐輪船赴津入境

必速著劉長佑先派大員在津迎護豫備剝船往大沽接運再酌雇船隻車輛由天津陸續裝運南下其開花礮隊酌挑輕利者帶赴行營其笨重者卽畱鎮津郡軍情旦夕變遷屆時何路緊要卽派赴何路防剿均由劉長佑與該道酌商辦理穩慎防剿其在直隸時歸劉長佑調遣俟曾國藩到東境卽歸曾國藩調遣每月餉項著直隸山東督撫按月各撥銀一萬五千兩必須如數解濟毋令缺乏所有軍火一切要需仍著李鴻章督令丁日昌隨時籌撥應用滬關應解夏季京餉五萬兩著准其作爲該軍北援餉需嗣後仍籌解十萬兩以符本年戶部原派之數賊匪竄撲濟甯著國瑞閻敬銘懷遵十三日寄諭妥籌防剿之策並著迅催劉銘傳一軍及張樹聲等軍由汶上滋陽一帶節節進剿該逆見自滋陽西境甯陽南境直至嘉祥徧滿運河東西兩岸分作兩路必有狡謀

閻敬銘身任封圻平時毫無準備任聽賊匪來往自如實屬大負
委任著卽督飭地方文武聯絡團練認真防守遊擊周森藻令其
督帶礮船梭織巡防並飭黃河北岸州縣添勇防守省城防禦事
宜仍須嚴密布置毋稍疏懈國瑞收集各軍前據奏稱已有馬步
數千究竟爲數若干能否得力著與丁寶楨所部嚴守濟甯力扼
運河東岸不得任賊偷渡再干重咎官文劉長佑吳昌壽吳棠喬
松年均當就派出兵勇固守本境直隸旣調有重兵該逆不得逞
志於直東必圖四竄官文吳昌壽吳棠喬松年惟當於各該本境
層層設伏出奇截擊以期聚殲毋任他竄如由何路竄突定將何
省督撫從重治罪決不寬貸劉銘傳張樹聲詹啟綸等軍見抵何
處何以尙未到東著曾國藩吳棠喬松年就近飛催如有心延誤
卽行從嚴參辦昨據曾國藩奏接奉寄諭部署入東擬於月內起

程先赴徐州以徐州爲老營並赴濟甯察看帶親兵三千人並劉松山等軍仍另募徐州之勇添練馬隊直隸山東河南三省均須造船分別河干擬撥礮三百尊分濟三省解至濟甯由三省派船前來迎接等語江南之船與黃河水性不合亟宜斟酌船式採辦木料招募水勇以成勁旅著劉長佑閻敬銘吳昌壽妥爲經畫趕緊籌辦並派撥船隻赴濟迎解運到礮位分別安放惟此時運河東西兩岸多係賊氛曾國藩於此項礮位解東時須派兵護送探明道路毋借寇兵而資賊用此時東省情形日亟蔓延愈廣該大臣一日未到諸將無所稟承勢如亂絲毫無頭緒仍須趕緊布置起程先駐徐郡以劉銘傳周盛波等軍爲前敵並迅速派得力大員分道籌辦以牽賊勢而固軍心至未盡事宜到徐仍可次第籌辦該大臣定能領會此意紓朝廷宵旰之憂也正在寄諭間據劉

長佑奏賊匪由汶上屬之袁路口徑渡運河自巳至酉始竣濟甯有兵扼截自難飛越誠恐折向東阿東平等處則自張秋黃水穿運迤東李連橋魚山滑等處較爲喫重東省毫無準備處處可渡且賊計多端難保不佯作東行復折西竄劉長佑擬將派防開濮一帶兵勇抽調二三千名分赴東阿齊河協同東軍一體嚴防竄屬不分畛域著國瑞閻敬銘迅卽籌派兵勇飛催南軍入境與直隸所派之兵合力防剿不得專恃客兵置身事外另片奏逆竄張秋以東之北岸河防尤關緊要該督已令劉祺營勇暨天津海口兩營官兵由景州赴往平齊河一帶飭臬司李鶴年等督同副將崔福泰等所部標兵赴景令楊毓枬率武安軍由范縣赴張秋與張得祿等剿堵所籌均妥該督卽赴景州與崇厚會商如齊河等處軍情喫緊崇厚卽仍遵前旨帶洋槍隊赴齊河一帶以資控扼

大名防務劉長佑責成該鎮道等妥爲辦理不可稍涉大意又片奏鄭魁士不能得力等語鄭魁士著毋庸調赴軍營前調之宣化鎮總兵張詩日總兵余承恩著曾國藩沈桂芬飭令該員等趕赴劉長佑軍營聽候調遣將此由六百里加緊各諭令知之○諭李鴻章奏閩賊李汪兩逆人數眾多見分竄粵東邊界並有另股由福建永定上杭回竄江西之謠難保不勾結霆營潰勇乘虛內犯江楚邊界須有重兵堵剿若稍涉大意該逆或由建昌廣信一帶舊路竄入皖南則蘇浙餉源重地防不勝防等語前據李鴻章馳奏閩省官軍已將漳州克復其漳浦南靖平和雲霄各城該逆亦斷難久踞勢必西竄江境希圖苟延且霆營潰勇亦有赴閩投奔髮逆之說見尙在銅鼓營一帶盤旋會昌縣駐紮之婁雲慶一軍前亦因索餉思潰雖經孫長紱籌解銀米勉強拊循此軍究未可

深恃見在江省防務最關緊要左宗棠洞悉賊情素顧大局著卽
迅撥得力勁兵繞出江西邊界合力兜圍務將李汪逆股就地殲
除毋令闖入鄰疆致滋延蔓李鴻章派援閩省之郭松林楊鼎勳
兩軍並著左宗棠飭赴江西湖南邊境以備迎剿而固腹地門戶
李瀚章所調之趙煥聯等計已到防卽著嚴飭該員會同江軍將
銅鼓營一帶叛勇殄除淨盡仍隨時確探閩賊消息嚴密防範以
備不虞孫長紱亦卽督飭諸軍迅將霆營叛勇剋日剿除廓清腹
地仍選派勁旅協同左宗棠派出之軍併力嚴防閩賊西竄毋稍
遲誤將此由六百里諭知左宗棠李瀚章並傳諭孫長紱知之○
諭駱秉章奏官軍越剿黔匪屢獲勝仗一摺黔匪僞朱王聚眾二
萬餘人盤踞正安州城總兵李家福等督率所部進攻殲賊甚夥
立將安順場老鷹關攻克遵義府城被圍甚急仁懷桐梓綏陽正

安等州縣徧地皆賊亟應實力進剿以靖寇氛劉嶽昭見在已抵松坎著駱秉章督飭該藩司會同李家福等乘勝進攻將正安州城迅圖克復節節進逼掃蕩而前力解遵義之圍以期次第廓清疆圉黔省匪勢甚張若僅恃川軍越境剿辦此拏彼竄尙不足以制其奔突著李瀚章抽撥勁旅由銅仁松桃一帶進兵與川省所派之軍分途進剿則賊勢爲我牽制剿辦較易得手勞崇光張亮基當就黔省見有兵力會同湘蜀官軍協力剿洗迅殄逆氛毋得專待客兵輒以兵餉兩絀爲詞致誤戎機自干咎戾將此由六百里各諭令知之○諭扎克當阿等奏古城危急旋探聞滿城被陷暨南北兩路防務緊急特參救援不力各員伊勒屯奏古城被陷奇台勢孤各摺片古城失守奇台危急前據文麟等奏到情形大略相同疊經諭令都興阿等派撥德祥鶴齡等軍出關援剿旋據

報德祥之軍已抵哈密本日扎克當阿等摺報內稱恩麟改委參將成桂護理肅州鎮德祥因等候交卸未卽起程改派署遊擊尤光組帶兵出關是否係發報日期在德祥未到以前德祥及尤光組所帶援師見在曾否行抵哈密著扎克當阿伯錫爾飛速迎提並著恩麟懍遵前旨迅催赴援毋稍遲緩鶴齡一軍久已行抵秦州前經諭令成祿督同該總兵所部取道安定進剿肅甘踞匪卽乘勝規復嘉峪關相機出關督剿著都興阿穆圖善迅卽飛咨成祿嚴飭鶴齡一軍設法赴援成祿亦卽統帶所部相繼前進妥籌援剿見在哈密巴里坤兩城防務均形喫緊著扎克當阿伯錫爾伊勒屯等各就存城兵勇愼密防範以待援軍並檄飭文麟激勵兵團固守奇台待援毋稍疏懈該二城需餉甚急前次運存科布多餉銀八萬兩見經扎克當阿等會派員弁赴科迎提著廣鳳奎

昌卽將此項餉銀提交該二城派來員弁仍添弁兵沿途護解前赴哈密一俟解到卽由扎克當阿等酌覈分撥以濟軍餉奇台兵力單薄並著廣鳳奎昌於科屬蒙古官兵內酌撥勁旅往援其新疆南北各城見在情形並著廣鳳扎克當阿等設法偵探迅速馳奏都興阿穆圖善仍遵前旨迅拔甯夏卽統帶重兵出關剿賊並著恩麟將所需餉糧迅速寬爲籌撥以利軍行其赴援古城不力遽行折回哈密之章京達薩杭阿著卽行革職至帶勇由奇台折回之把總趙英傑及被擄之回目蘇皮益等並著扎克當阿等查明分別懲辦將此由六百里諭知都興阿穆圖善廣鳳奎昌扎克當阿伯錫爾伊勒屯並傳諭恩麟知之○庚戌 上詣 大高殿祈雨○詔補行浙江辛酉壬戌兩科鄉試○廣江西瑞州府學額四名雲都縣十名永新八名奉新三名湖南江華四名○辛亥諭

軍機大臣等崇厚奏調兵馳赴在平協防河岸並請派員辦理沿河民團神機營奏派兵前往河間駐防各摺片前因吳昌壽奏請飭令崇厚進紮齊河諭令該侍郎酌量辦理茲據奏稱在平一帶是東平東阿後路自張林以下大河北岸最爲緊要見在札調駐景之天津大沽兩標兵及副將劉祺所募勇丁一營共一千五百名派員帶赴在平一帶駐紮歸陳濟清統帶其洋槍隊一千五百名仍紮景州與前敵遙爲聲援等語昨據劉長佑奏逆匪渡運東竄飛催劉祺營勇暨天津海口兩營官兵由景州拔隊赴在平齊河一帶分駐協防此次崇厚擬派兵勇卽當係劉長佑前奏札調之兵統俟崇厚劉長佑晤面時相機布置妥籌調派賊旣渡運東竄難保不直撲省垣齊河不獨與濟南府城安危相繫且路通景德尤爲畿南屏翰該處係大清河北岸扼要之區非有重兵駐守

不能扼賊北渡劉長佑雖已派兵分防齊河仍恐兵力單薄閻敬銘責無旁貸自當籌添兵勇與直隸所派各營力扼要區以固畿疆門戶不得置身事外致誤軍機在平一帶該撫亦應添兵協力布置以扼要衝周森藻等所部礮船數十隻並著飭令該員校織巡查毋得片刻鬆懈東省兵力單薄若厚集民團聯絡聲勢自可輔兵力之不足衛榮光前在侍讀學士任內曾有聯絡鄉團防河緝匪之奏是其於辦理團練尙有所見著閻敬銘卽飭衛榮光馳赴東昌在平扼要處所督率各該地方官勸辦民團與兵勇協力巡防妥爲策應知州張應翔既據崇厚稱其於辦團調練尙爲諳習並著閻敬銘飭令該員辦理沿河一帶團防以期得力畿南地面遼闊必須勁兵駐紮彈壓見經神機營撥派官兵二千名交蔣臨照長春管帶赴河間一帶駐紮歸崇厚節制並可爲該侍郎後

路聲援將臨照等均係曾經行陣之員此項官兵駐紮處所與崇厚相近到防時著崇厚責令該員等將撥派之兵實力教練以備緩急惟兵數僅止二千如遇事機緊急必須調撥亦須令全隊前進不宜分撥太單致不得力仍應一面飛速具奏再由神機營另撥精兵前往駐紮又據御史汪朝榮奏沿海水師營務廢弛請飭提鎮等官勤加操演等語沿海水師辦理海防至爲緊要若如該御史所奏種種廢弛弊竇叢生若不嚴加整頓何以肅營制而重海疆著閩敬銘嚴飭水師員弁認真訓練力除委靡惡習毋得視爲具文原片著鈔給閱看將此由六百里各諭令知之○予故直隸正定縣知縣周灝建祠○壬子左宗棠徐宗幹奏漳州踞逆經官軍疊次擊敗後四月二十日王德榜劉清亮會同郭松林楊鼎勳等軍進攻北路烏頭門先將壘外花椿木城拔取殆盡賊猶死

拒高連陞所部守備何世載首先攻破一壘各壘之賊羣相駭愕官軍乘勢齊上立將賊壘十四座次第攻克殺賊萬餘名餘逆悉向南靖逃竄王德榜追至天寶寨該處踞逆亦聞風潰竄時高連陞黃少春等所部遙見烏頭門一帶煙燄蔽天卽各率隊肉薄寨垣蟻附而上逆眾敗潰官軍追至東關將附城各賊壘焚燒餘匪棄壘望城而竄高連陞黃少春率各營躡蹤追殺奪門而入署水師提督曾玉明率臺勇亦將石亭賊卡攻破由南門殺入侍逆率其死黨由西門逃竄當於二十一日亥刻將漳州府攻克劉清亮見高連陞黃少春兩軍進攻東門慮賊由南靖竄走當率所部由北門繞赴西路截擊斃賊千餘名生擒僞朝將僞天義等賊目數十名王德榜又率各營於南靖大路河邊截之殺賊四五千名溺斃不計其數其康國器一軍將城東坑竄賊擊敗後劉典復於初

十十一等日飭各營將奎洋梅林等賊壘掃蕩斬悍賊近千拔出
難民數千汪逆遂折向大埔一路逃竄劉典移軍進攻南靖適漳
州已復王德榜率軍追至距城五里地方見該逆正與劉典一軍
接戰王德榜卽麾隊猛進該逆爲敗賊牽動勢不能支紛紛奪路
狂竄劉典王德榜各軍衝殺而入二十二日立將南靖縣城攻克
餘賊分數路而遁此次攻克府縣兩城破賊壘三十餘座賊目伏
誅者必多侍逆由南靖鼠竄未卜能否成擒臣等惟督飭諸軍盡
力追剿斷不收爲畫疆自守之計見在蘇軍由漳州進攻漳浦以
達雲霄詔安與粵東黃岡守軍聯絡可杜該逆入海之謀浙軍由
南靖漳州追賊以向平和可與粵東饒平守軍聯絡其緊連粵東
大埔一帶則總兵王開琳延建邵道康國器及都司關鎮邦各軍
扼永定之撫溪湖雷及上杭等處查汀州至潮州一水可通溪涵

湍急粵軍若能憑河遏截則侍瀧兩逆圖竄亦難臣宗棠卽由興化赴漳察看賊蹤趨向督率各軍相機追剿務期迅掃餘氛此次各軍異常奮勇除江蘇援軍郭松林楊鼎勳兩營應由江蘇撫臣奏報外其餘尤爲出力及陣亡各員弁謹先行開列奏請分別獎卹又奏李侍賢汪海洋上年由江西竄粵由粵東竄閩其時江西追兵不入粵粵東追兵不入閩逆賊得以壹意狂奔闖入閩境而江西粵東專顧本省藩籬仍屯兵邊界臣宗棠於兩省援閩之兵並未嘗調其深入也計江西兵之援閩者僅王文瑞新湘營四千本係臣宗棠舊部而食江西之餉此外食江西餉者惟王德榜所部長左營合計不過五千五百人而新湘營見在仍隨王開琳老湘全軍分扼永定上杭冀其能固守江西藩籬已爲幸事至論閩之用兵則由內而外由東北而西南實局勢自然之理必得本省

腹地漸清方可與鄰省共謀交擊之效又奏據延建邵道康國器稟稱四月初十日知府康熊飛參將詹惠等進剿苦竹將附近賊壘賊館悉行踏毀汪逆海洋親率悍黨數千由大溪馳援適與康熊飛詹惠等遇於東坑官軍奮勇直前該逆亦拌死格鬪康熊飛飭哨弁陳羅魁率隊從山後繞出奪據嶺巔賊眾譁潰官軍一擁齊上殺斃及墮崖死者無算餘逆退踞湖坑大溪一帶十四日康國器飭各軍分路追剿將胡坑大溪賊壘掃除直抵大埔所轄三角塘太平寨始收隊而還計是役共斃賊二千餘名生擒百餘名拔出難民三千餘查該逆竄踞苦竹奎洋一帶與南靖漳州互相犄角茲幸先將苦竹等處賊壘掃蕩所有最爲出力之帶勇文武從前克復龍巖州城未及隨摺請獎茲復攻破賊巢補行開列懇請獎勵上諭內閣左宗棠等奏官軍攻克漳州南靖兩城一摺

勦辦甚爲奮勉著左宗棠李鴻章等督飭諸軍盡力技勦殲擒巨逆以靖地方○諭徐宗幹奏丁憂撫臣請在籍終制據請代奏一

摺前任江西巡撫沈葆楨在江省數年士民愛戴吏治軍務均能

整飭前因丁母憂回籍諭令該撫於百日後馳赴署任視事茲由

徐宗幹代爲陳奏懇請終制養親情詞懇摯覽奏惻然不得不勉

如所請沈葆楨著准其在籍終制以遂孝思○曾國藩奏伏查注

重徐州經營十三府州者將來勦捻之長策也先顧畿輔安定直

東人心者目下應變之急圖也黃河當仲夏盛漲之候北岸有劉

長佑列防之兵謂賊難以渡河者事理之常可以臆度也汛遠而

防兵太單賊多而土匪勾引恐賊猝然渡河者軍情之變不可逆

料也萬一賊竟北渡則臣前疏所言未免狃於常而忘於變明於

將來而昧於目前正在籌思無策之際接准李鴻章來咨派常

道潘鼎新統帶所部淮勇十營由輪船駛赴天津有此一軍自足壯畿輔之威至劉銘傳一軍定於五月初八日啟程赴直臣查曹濟等處一片賊氛國瑞駐紮濟甯深恐孤軍受敵再有挫失因檄令劉銘傳先赴濟甯與國瑞會商進止如賊竟渡河北則該提督一軍應由東阿平陰一帶渡黃在東昌境內迎剿若賊未渡河則仍應駐濟甯進剿鄆城一帶之賊有潘鼎新專駐河北之師以助劉長佑有劉銘傳可南可北之師以助國瑞目前局勢似可以保無虞臣到山東後卽當力擊曹濟之賊驅之西竄俟軍情大定仍當回駐徐州就臣上次摺內所稱十三府州者扼要設防分道兜剿務使捻匪東出西沒皆不能出吾網羅之外庶彼勞我逸致人而不致於人是否有當伏候 聖裁惟節制直東河南三省則臣不敢拜此寵命臣以菲材忝司兵柄江南初立寸功皆諸將艱難

百戰而成臣並未躬冒矢石頻叨懋賞抱慚已久今則精力衰頹萬難再膺艱鉅卽久駐徐州專辦十三府州捻匪亦自度能言之而不能行之前疏請另簡督辦大臣而臣以閒散人員效力其閒尙未奉到批旨更何敢肩荷非常節制三省惟有籲懇 天恩收回成命俾臣稍安愚拙之分不爲眾責所歸感戴 鴻恩曷其有極至直東河南三省軍事凡臣思慮所能及自當知無不言言無不盡直隸獨處河北除此次宜集各路之兵急援畿輔外嗣後應責成該省總督另籌防兵不可調南岸之師往來渡黃疲於奔命河南山東兩省除豫之歸陳齊之充沂曹濟另由大臣督辦外其餘各屬應責成兩省巡撫另籌防兵不可使剿捻之師追逐千里永無歸宿臣前疏已略陳梗概茲更反復申明不特臣難勝鉅任卽才力十倍於臣者籌辦此賊似亦不必有節制三省之名區區

愚忱伏乞俯加采納臣急欲啟程因撤勇之資征兵之費需銀十餘萬尚未措齊而水陸各軍畱於江皖經手事件極多必待李鴻章到甯後一一面爲交代乃可清晰又奏言臣此次馳赴山東隨帶楚勇無多所有潘鼎新劉銘傳張樹聲周盛波等四軍皆係淮勇經李鴻章兄弟苦心訓練而成者臣擬帶甘涼道李鶴章前往總理營務處庶幾上下交孚呼應尤靈惟該員抱病已久舊傷時發曾具稟臣處請代奏開缺調理臣以李氏兄弟所向有功不赴甘涼迹涉規避雖經批准尚未陳奏此次臣帶李鶴章北征擬令隨臣左右不使常履行間衝鋒陷陣儻傷疾並發准其隨時離營醫治以示體恤惟淮勇勦捻非年餘所能速了而李鶴章之疾亦非數月所能速痊合無仰懇天恩准開李鶴章甘涼道本缺俾該員有調養之便而臣亦收指臂之效實屬兩有裨益又查李鴻

章之季弟候選郎中李昭慶英毅穩練亞於諸兄將來亦可獨當一面擬令卽赴臣營差遣於治軍必有成效國瑞奏擒匪在濟甯西北各路偏寨索糧疊經官軍擊退訊據獲賊僉供該逆大股因不得偷渡黃運兩河又因濟甯防守嚴密無隙可乘意在南竄回巢裝旗聚人再圖竄擾等語刻下金鄉嘉祥二縣及洋山等處已見賊蹤昨據魚臺等縣稟報有捻逆南趨見至沛縣圖困豐縣是該逆意在回巢似屬可信至提督劉銘傳已於五月十四日統帶勇隊數千名行抵濟甯其後路勇丁尙未到齊臣與之會商擬令劉銘傳所部各營卽往長溝東北至安居一帶紮營臣卽於見集勇隊並丁寶楨各營內擬派三四千名佐以馬隊二三百名會同劉銘傳擇要扼紮先遏該逆竄渡運河之路以固北面藩籬至西路之軍見尙未接詹啟綸宋慶報到曹州之信臣飭托倫布常星

阿暫守曹郡以爲西路策應侯詹啟綸宋慶二軍到齊再行酌量
調派正在籌畫間據英翰稟稱擬由亳州一路節節向曹屬一帶
進兵見候喬松年指揮前進臣卽飭英翰取道豫東交界之虞城
縣擇要安營相機堵剿陳國瑞一軍已傳知由西路取道開東馳
赴劉長佑軍營上諭軍機大臣等曾國藩懇辭節制三省之命
具見謙抑爲懷不自滿假惟東豫之軍自僧格林沁戰歿後軍無
統轄號令不一最爲兵家大忌該大臣更事旣多成效夙著若非
節制直東豫三省恐呼應未能靈通毋再固辭著俟李鴻章到江
甯省城趕緊督兵北上籌辦一切至所稱駐紮徐州專辦十三府
州捻匪直隸獨處河北應責該督另籌防兵不可調南岸之師往
來渡黃河南山東兩省除歸陳充沂曹濟外其餘各屬應責成兩
省巡撫另籌防兵不可使剿捻之師追逐千里永無歸宿等語著

劉長佑閻敬銘吳昌壽卽照該大臣所籌將應行防守事宜認真布置妥爲經畫不得恃有曾國藩一軍遂各置身事外儻何路稍有疏虞定惟各該省督撫是問劉銘傳一軍已到濟甯著該提督卽往長溝東北至安居一帶紮營國瑞丁寶楨所部當與之互相聯絡先遏賊竄運河之路仍伺隙進擊務在必勝方足以寒賊膽而伐狡謀詹啟綸宋慶見在何處何以尙無到曹州之信著國瑞嚴催該總兵等伺賊不備於中路邀截儻任意遷延畏葸不進卽著從嚴參辦賊因北路防守甚嚴日漸南趨金鄉嘉祥二縣及羊山等處已有賊蹤又有髮捻南趨沛縣圖困豐縣著曾國藩吳棠督飭周盛波張樹聲等軍實力截剿清淮後路如兵力尙單卽著曾國藩李鴻章續行調派以資厚集此賊自南而北綿亙數百里若得大枝勁旅於中截斷使之首尾不能相顧較易破滅著曾國

藩等妥商調派英翰之軍能否赴徐會剿著喬松年酌量調令前進曾國藩須俟李鴻章到江甯後面爲交代方能起程著李鴻章迅卽交卸撫篆馳赴江甯接印視事以便該大臣督兵赴徐潘鼎新淮勇並著催令由輪船赴天津專顧河北一路本日因甘省情形日亟軍無統率已令楊岳斌仍行赴甘其蔣凝學一軍令折回河南以防賊匪趨豫之路著吳昌壽卽將蔣凝學一軍調歸豫省安爲布置姜玉順所部九營著官文趕緊派令赴豫歸吳昌壽調遣不准再有遷延豫省得此兩軍可以扼要設防遇賊卽擊毋令闖入腹地崇厚見在景州督帶槍隊卽著就見有兵力穩慎籌防力顧畿輔門戶仍隨時與劉長佑函商策應毋稍大意曾國藩另片奏請將李鶴章開缺辦理行營營務等語李鶴章著准其開甘涼道缺畱於曾國藩軍營辦理營務郎中李昭慶著准其畱營訓

練徐州新勇並著李鴻章飭令該員卽赴曾國藩軍營聽候調遣
昨據賀壽慈奏楚豫兩省寇患方殷請令兩省督撫豫籌剿賊並
請責成蘇廷魁唐際盛襄理軍務等語蘇廷魁唐際盛於軍務能
否諳習著官文吳昌壽酌量委任以資臂助原摺著鈔給官文吳
昌壽閱看又片奏願嘉蘅兼辦南汝光一帶民團等語願嘉蘅五
守南陽素得民心著吳昌壽責成該府將南汝光一帶團練認真
籌辦以固楚豫邊防原片著鈔給吳昌壽閱看又據御史汪朝榮
奏沿海水師營務廢弛請飭提鎮等官勤加操練著曾國藩劉長
佑李鴻章嚴飭海疆水師員弁加意整頓不得視為具文原片著
鈔給曾國藩等閱看陳國瑞著仍遵前旨迅赴直隸歸劉長佑調
遣昨據汪朝榮奏知縣邵承紀在陳國瑞軍營帶隊打仗屢著戰
功於山東全省地勢捻蹤出沒之區瞭如指掌請交閭敬銘差委

邵承紀是否在軍營出力著陳國瑞卽令該員前赴閩敬銘軍營聽候調遣正在寄諭聞據吳棠奏賊由曹境南竄徐西之豐沛地方見調周盛波張樹珊等軍協力禦賊與寄諭辦法適相脗合著卽督令在防各將弁及地方文武先行固守乘閒兜擊周盛波軍卽令在徐駐紮毋庸北來徐州接仗情形著吳棠迅速續報以慰馳繫此賊已大股南下曹濟等處有無餘匪著國瑞閻敬銘查明具奏並著督軍勦洗將土匪嚴行搜捕以靖奸宄而防勾結龔文林礮勇到直著劉長佑妥爲布置賊眾或分或合倏南倏北往往以此等詭計懈我軍心未可因一意南趨疏防貽誤將此由六百里諭知官文曾國藩國瑞劉長佑吳棠崇厚李鴻章喬松年閻敬銘吳昌壽並傳諭劉銘傳陳國瑞知之○諭前據李鴻章奏蘇軍會克漳州府城本日據左宗棠等奏官軍收復漳州南靖府縣兩

城及攻克苦竹等賊壘並陳閩省腹地未清未能先顧鄰省各摺片逆賊竄踞漳州閩省全局震動經左宗棠調派主客各軍和衷共濟疊拔堅城實屬調度有方深堪嘉尚侍逆由南靖鼠竄已否成擒仍著左宗棠查明具奏漳州南靖克復該逆分路逃逸必將圖竄粵東見在蘇軍由漳州進攻漳浦以達雲霄詔安與粵東黃岡等軍聯絡浙軍分由南靖漳州追賊以向平和與粵東饒平守軍聯絡自不難乘此聲威掃蕩而前左宗棠前赴漳城著卽督飭諸軍乘勝兜剿如侍逆業經鋌走務當盡力追躡一鼓殄除其王開琳康國器各軍扼永定之撫溪湖雷上杭一帶並著飭令將大埔等處之賊嚴密截剿斷汪侍兩逆合併之路此時閩省腹地漸清左宗棠素能不分畛域必能與粵東官軍共謀夾擊不至貽患鄰封也廣東方耀李福泰等軍均已調回本境此時賊勢西竄潮

州大埔之防極爲緊要瑞麟郭嵩燾務飭防邊諸軍嚴陣以待賊蹤竄及卽與閩省官軍聯絡截剿毋得任令闖入滋蔓致干重咎賊不得逞志於粵恐尋熟路復趨江西王文瑞等軍分扼永定上杭諒能固守江西藩籬仍著孫長絨將毗連閩粵邊界層層布置毋稍疏虞左宗棠仍懍遵十五日寄諭揀派勁兵繞出江西邊境合力兜圍以免旁竄其郭松林楊鼎勳兩軍前據李鴻章奏請飭令駐紮江西湖南邊境以備迎剿而固腹地門戶見在該軍進趨漳浦雲霄一路能否調赴江楚邊境或另派一軍前往顧全腹地之處著左宗棠就近斟酌妥爲調派前據御史汪朝棨奏沿海水師營務廢弛請飭提鎮各官勤加操演等語著瑞麟左宗棠等督飭該省提鎮力除積弊毋得視爲具文如有衰弱庸劣之鎮將各員卽著嚴參罷斥以重海防原片著鈔給閱看將此由六百里諭

知瑞麟左宗棠徐宗幹郭嵩燾並傳諭孫長敘知之○諭楊岳斌等奏剿撫潰勇分別正法畱遣一摺陶茂林所部勇丁潰逃入陝沿途搶掠經劉蓉派副將彭體道等馳往曉諭馬隊頭目張起德蘇興隆經反復開導尙知悔悟而步隊頭目高選清卽高文義桀驁不馴沿途蹂躪鄉村攻撲村寨劉蓉會商楊岳斌德興阿調派馬步兵隊分投攔擊張起德反戈相向賊遁入堡蘇興隆縛出首犯高選清逆勇多就殲除其餘呈繳馬匹器械給賞分起遣散辦理尙爲妥速高選清卽高文義業經劉蓉等訊明正法梟示張起德首先就撫隨同剿捕蘇興隆縛獻首逆尙知愧奮均著從寬免議至竄赴甘肅兩當境內及百花川潰勇均已分別繳械就撫而通渭等處尙有另股潰勇南趨徽縣小道竄向略陽復被前途攔阻折回又有後起潰勇一千餘名陸續入陝前隊已過鳳翔著劉

蓉卽督飭劉綽等分投勦辦毋任紛竄其有欲由棧道入川者並
著駱秉章飭屬一體防範毋稍大意前因直東軍情喫緊諭令楊
岳斌勦辦此起潰勇後在西安候旨見在賊勢東趨劉長佑崇厚
已派兵至山東界上防勦李鴻章又派潘鼎新帶淮勇十營坐輪
船北來兵力漸厚甘肅軍情緊急都興阿在甯夏久未得手恩麟
一籌莫展連失嘉峪關肅州而甘州又復告急省城有坐困之勢
楊岳斌若不趕緊西行恐局勢日非將來愈難著手著於接奉此
旨後剋日整隊赴甘肅省城接印任事都興阿穆圖善等軍俟楊
岳斌抵甘肅後卽可酌量令其出關是楊岳斌止須駐紮甘省督
辦軍務無庸出關而於關外軍務亦有裨益務將軍營惡習地方
積弊認真挽回補救煥然一新並將交查事件秉公辦理以副委
任劉蓉另片奏請令成大吉到直東一帶扼紮該提督見在湖北

辦理金口潰勇一事尙未十分完結且楚北空虛恐將來餘賊再行回竄亦不可不畱兵布置所請著無庸議本日據國瑞奏賊之前隊回竄豐沛等語蔣凝學一軍由河南赴陝行尙未遠著楊岳斌迅飭該道仍折回河南偵探賊蹤所向迎頭截剿一俟直東等處髮捻肅清此軍仍卽飭赴甘肅歸楊岳斌調遣階州賊勢已蹙何以至今尙未克復本日劉蓉報內亦未奏及著駱秉章劉蓉催令各軍設法攻拔無令日久生懈致賊匪又行竄逸將此由六百里各諭令知之○諭劉蓉奏訊明陶營弁勇潰散緣由請派員查辦及密陳甘省積弊亟須整頓各一摺陶茂林所部勇丁潰逃入陝經楊岳斌等調派兵勇迎剿將勇目高選清等拏獲訊其潰散緣由僉供由於陶茂林貪淫刻薄短缺勇額縱携民糧捏報戰事各情所致雖係一面之詞惟劉蓉前已訪聞該提督前在鳳翔收

納回女所部將領紛紛效尤其所設營官多派兄弟親屬充當以專其利勇數實不足額又於製造旗幟號衣各項均將各勇月餉銀兩扣除是高選清等所供各情必非無因著楊岳斌於行抵甘省時將劉蓉所奏陶茂林貪污不法各重情逐一密查據實參辦毋稍徇隱至甘省吏治軍務日久總無起色據劉蓉奏稱其弊實由於地方大吏督兵大員冒功冒餉借軍功以納賄藉行軍以肆虐等語所奏不爲無見並著楊岳斌破除情面認真整頓挽救務將從前積弊盡力湔除如該省官吏仍敢故態復萌不知振作楊岳斌卽當隨時嚴參整辦不准稍事姑容致負委任雷正綰勇略素著如果吸食鴉片誠恐貽誤事機並著楊岳斌密察具奏劉蓉摺二件均著鈔給閱看將此由六百里密諭知之○諭恩麟奏查明肅州失事大概情形添兵馳剿及甯靈回逆屢撲中衛節次堵

擊獲勝各一摺甘省肅州逆回勾結獵戶占踞嘉峪關後糾眾攻撲州城知州陳墉出城彈壓被匪拘執該逆潛入東關復勾結賊內回弁馬天才劈開東門一擁進城護總兵成桂拒戰受傷落濠經民勇救護在南鄉民莊調治是否聞警先逃捏詞具報暨拒戰跌落城外之署吏目劉秀挹有無捏飾具稟情事均著恩麟確切查明據實參辦署安肅道恆齡是否被戕暨各武職員弁下落著一併查明具奏至署肅州知州陳墉被匪拘執輒用安肅道關防印發稟函捏稱肅州見已安靜毋庸調兵進剿並偏令各鄉漢民降賊抗拒官兵甘心從逆實爲法所不容抑係該逆假冒地方官銜名思逞狡謀著恩麟一併確查覈辦肅州回氛甚熾恩麟所派黎獻等軍由甘州節次接剿前進並抽調提屬官兵及張掖民團協助卽著檄飭該道等聯絡進攻並飭成桂會同劉秀挹激勵鄉

團併力殲剿以期克拔堅城毋任逆匪久踞靈州竄匪疊撲中衛
縣城及廣武棗園等處甯郡踞匪因被剿窮蹙亦糾眾力爭中衛
一路冀圖西竄甘涼雖經官軍節次堵擊敗走惟梁生嶽所部數
止一千五百餘名合之都興阿所派王贊襄練勇亦僅四千餘人
兵力較形單薄如該匪大股西趨勢難抵禦雷正綰一軍已由鹽
茶北進著卽酌度軍情抽拔數營徑赴中衛駐守力遏敗匪西竄
都興阿穆圖善當懷遵前旨乘甯夏賊勢已蹙迅圖攻拔卽分兵
兼顧中衛等防鶴齡一軍已抵鞏昌並著都興阿穆圖善雷正綰
恩麟催令迅援肅州與諸軍協力進剿俟肅州克復仍令星速出
關恩麟請調之昆都倫等部落蒙兵著仍遵前旨毋庸調往以節
糜費將此由六百里諭知都興阿穆圖善雷正綰並傳諭恩麟知
之○以復漳州等城功賞提督高連陞郭松林珍物予陣亡參將

鄭金麟等祭葬世職○予江南殉難布政使祁宿藻建祠 追予

福建臺灣陣亡遊擊葉得茂世職建祠○以東省逆氛肆擾諭閩

敬銘等防護 孔子林廟○黔匪陷廣順州城旋復之子陣亡道

員于鍾岳祭葬世職建祠並其父知縣崇璟建祠○追予貴州陣

亡知州何維新祭葬世職建祠縣丞曾晉等祭葬世職○癸丑諭

內閣張亮基奏前貴州學政吏部考功司員外郎陸仁恬在黔數

年士民信服前於逆匪竄迫省城時該員隨同張亮基等布置城

防勤勞靡間茲差滿交卸回京請將該員照京察一等例記名以

道府用以示鼓勵等語京察爲朝廷激揚大典在部司員悉由各

該堂官考覈情勤分別優劣向無由外省督撫保列一等者且學

政係特簡人員尤非督撫所能擅保張亮基率行陳奏實屬不諳

體制所請著不准行○諭軍機大臣等有人奏功臣宜知儆戒請

嚴加訓迪俾得保全等語據稱江蘇巡撫李鴻章戰功雖著而子惠未孚百姓之流離者未曾收恤地畝之荒蕪者未盡開墾不聞德政惟聞厚斂並以侍郎殷兆鏞前疏極言江蘇橫徵暴斂之害皆指李鴻章而言等語李鴻章自簡任江蘇巡撫以來疊克城池肅清全省厥功不爲不大惟以該省事同勦始委用之人較多則流品易雜籌餉之途稍廣則民怨易滋今軍務未竣待用孔亟抽釐之局自不能全行裁撤若如該侍郎所奏各捐未免太形瑣屑至官親幕友遊客劣紳爭充委員擅用令箭旗牌等事紳董稍假事權擅作威福恐亦在所難免著李鴻章將不肖委員嚴加裁汰釐卡仍以歸併爲主俟軍務肅清再行次第撤裁另片奏江蘇各項捐款加以各縣田捐歲可收銀四十萬兩等語江蘇捐款雖繁亦斷不能如所奏之多究竟可得若干如何開支著李鴻章造冊

報部覈銷該撫受委任之重惟當體朝廷恫瘝在抱之念與民休息以期日臻上理以上各情有則改之無則加勉以無負諄諄誥誠之意原摺片並殷兆鏞摺均著鈔給閱看將此諭令知之○諭前令國瑞在山東招集潰卒見在陸續歸營者諒已不少惟其中良莠不齊務須嚴加稽查分別畱遣方免匪徒溷迹之虞乃近聞該營中有投誠粵酋馬融和捻首劉添幅等雜處其中並有遣劉添幅募勇徐宿之事此等降匪向背本無一定即使真心效順亦必察其動靜歷久無他始可漸加委用若遽予以事權則犬羊之性難保不再萌異志桂錫楨之事可爲炯鑒馬融和見今尚未帶隊卽著國瑞妥爲羈縻徐化其反側之心不可驟加委任並設法將劉添幅檄調回營毋庸在徐宿募勇尤貴不動聲色默爲轉移毋貽後患將此密諭知之○諭陳國瑞奏見在整飭軍務偵探賊

勢大概情形並郭寶昌見赴濟甯遵旨拏解各摺片所陳賊蹤由東路分竄與國瑞等前奏情形大略相同前因直隸防務緊要疊經傳諭陳國瑞迅赴直境歸劉長佑調遣該總兵何日啟行北來仍著劉長佑酌量迎提嗣後軍營應辦事宜並著傳知陳國瑞呈報該督覈辦具奏毋庸由該總兵自行奏報以一事權其陳國瑞未抵直隸以前一切軍情應歸國瑞間敬銘奏報郭寶昌所部勇丁並飭令陳國瑞妥爲鈴束籌給月餉毋令心懷疑懼致滋事端至襄辦營務之知縣楊育才據陳國瑞奏稱從前係苗逆謀主心存叵測恐與逆匪潛結滋事楊育才著先行革職交國瑞劉長佑確切查明如該革員實有不法情事卽在軍前正法以昭炯戒正在寄諭間據劉長佑等奏馳抵威縣會籌防剿並崇厚前赴東昌駐紮請將東昌沿河文武均歸調度閻敬銘奏賊匪分股南竄情

形各摺片逆匪盤踞濟甯之長溝地方分股南趨豐沛等境見在
范漢一帶賊未淨盡亟應合力併攻盡殲醜黨本日據陳國瑞奏
詹啟綸部隊及托倫布等收集馬隊均抵曹州兵力較厚著國瑞
閻敬銘懷遵昨日寄諭檄飭諸軍將由曹赴濟之路併力疏通節
節進剿以遏匪蹤回竄劉長佑因東省防兵較單飛檄護天津鎮
春霖等軍分赴荏平等處布置該督與崇厚馳往東昌察看沿河
形勢會籌設防該督等不分畛域深堪嘉尚著劉長佑將防務辦
理周妥仍卽馳回直境崇厚卽著駐紮東昌督辦防務所有東昌
一帶沿河地方文武均著歸崇厚調度以專責成其神機營派去
之圓明園擡槍隊及巡捕營兵共二千名應否仍駐紮河間並著
劉長佑崇厚酌量調派陳國瑞一軍據閻敬銘奏見紮曹州正資
得力並著劉長佑酌度北路情形如直境防兵已敷分布卽令仍

紮曹州扼勦儻必須該總兵赴直協防卽遵前旨飛提北上並妥爲調派以資兜勦將此由六百里諭知國瑞劉長佑崇厚閻敬銘並傳諭陳國瑞知之○諭孫長紱奏叛勇竄撲袁郡擊敗閩賊圍困永定派隊赴援一摺霆營叛勇攻撲袁州府城經官軍擊敗由萍鄉竄逸該逆裹脅已至萬人若由吉贛以趨閩粵恐與閩賊勾爲一氣勦辦更爲棘手著孫長紱督飭派出之席寶田等軍會合成大吉等協力兜勦毋任滋蔓婁雲慶所帶霆軍由閩退回經王文瑞等湊放餉糈始行撫定而汪海洋等逆復回竄永定與李侍賢等股合圍老湘營城內米糧缺乏外無援師其分紮城外之湘軍入營亦被圍撲折傷無數情形危急萬分婁雲慶赴援之軍能否得手尙無把握儻該逆擁眾西趨則由閩竄江又將不可收拾著左宗棠迅飭漳州得勝之師馳赴永定上杭救援截擊力解城

圍仍遵昨日寄諭繞赴江西邊境盡力兜圍毋任擾及完善孫長
紱並飭席寶田趕將叛勇撲滅回紮瑞金一帶以資扼守撫建防
兵關繫至要並飭劉于涪水陸各軍嚴密布置毋稍疏虞其曾國
藩派往江西之劉連捷等軍並飭趕緊迎提藉資戰守賊旣由大
埔回竄粵東方耀等軍能否分援永定以剿爲防著瑞麟郭嵩燾
妥籌調度仍當慎固封守方爲妥善將此由六百里諭知瑞麟左
宗棠徐宗幹郭嵩燾並傳諭孫長紱知之○雲貴總督勞崇光等
奏請調江南得勝之師分道來黔以圖大舉得旨著該督撫先飭
本省之全祖凱張文德等軍盡力剿除其進剿遵義之軍若能與
川軍併力廓清遵屬亦可通川黔之氣藉佐聲援該督撫當力爲
其難毋得畏難思阻致負委任又奏勦辦遵義大定等屬踞匪因
兵單餉乏猝難成功批著仍督莫超宗鄧爾巽等將遵義大定等

屬踞匪次第翦除省南屯軍扼賊尤當嚴爲布置黔省固屬瘠區該督撫亦當就見有兵力聯絡鄉團力圖補救毋得以餉絀兵單稍存諉卸○甲寅雨○乙卯諭軍機大臣等李鴻章奏援閩蘇軍克復漳浦籌辦情形並運解開花礮赴津擬派洋槍隊伍北上各摺片漳浦縣城既經郭松林楊鼎勳等督兵攻克逆勢益衰勦辦較易得手惟該逆窮而思竄勢必折趨鄰省另圖生計見既有竄擾江西之信則甯都瑞金一帶防務最關緊要孫長紱務當飭令婁雲慶一軍嚴扼邊境毋令賊蹤闖入致滋蔓延左宗棠素願大局自應派兵四面兜剿就地殲除不得畫疆自守如賊蹤已入江西卽著親督全軍越境窮追務期與孫長紱派出各軍會合夾擊總以殄滅淨盡爲度不可稍分畛域致令垂燼餘匪又成燎原之勢徐宗幹亦當督飭地方文武聯絡紳團以助兵力所不及本日

已明降諭旨令劉坤一補授江西巡撫見值該省防剿喫緊之際該撫卽著速赴新任毋庸來京請訓俟抵江西後卽督飭將士嚴密布置以期速殄賊氛郭松林楊鼎勳兩軍卽著左宗棠李鴻章迅飭繞赴江西楚南邊界杜截竄擾湘省之路應需糧餉卽著李鴻章飭令丁日昌由江海關稅內酌籌解濟至落地開花礮爲行軍利器李鴻章卽派潘鼎新統領淮勇九營並開花礮隊一營北上著該撫飭令迅速由滬航海赴津見當直東軍務喫緊之時所有輪船雇價自難過與較值總以多行定雇速行開駛北來爲要其礮子解津以後如須由陸路載運東省津門見有演習之礮車可期載用輕便不至運掉維艱著李鴻章卽將需用礮子多解赴津以備施放並著派令熟練委員帶領匠役器具由輪船一併赴津開局鑄造炸彈以利攻擊東省賊蹤雖有漸趨徐郡之勢而雷

住曹郡者應亦不少該逆蹤迹飄忽奔突靡常難保不由徐郡回竄山東見在軍情萬分緊要李鴻章既於本月二十日由江路駛赴金陵著曾國藩於交篆後迅卽督帶親軍馳赴濟甯一帶居中調度力籌防剿毋再稽延天津見有新練洋槍隊一千五百名調赴直東一帶防堵足敷應用蘇省洋槍隊止有千名僅敷本地之用卽著仍畱青浦毋庸調赴直隸管帶洋槍隊之副將余在榜袁九皋二員亦著毋庸再調曾國藩等所奏請嚴禁大戶包攬漕價一片著暫行畱中俟戶部將該督等覈減錢漕等摺議奏時再行明降諭旨將此由六百里諭知曾國藩左宗棠李鴻章徐宗幹劉坤一並傳諭孫長紱知之○諭成祿奏安定圍急催兵助援疏通蘭省東路以利西行一摺甘省河西賊氛甚熾逆回復糾合河狄之眾圍逼安定陶茂林駐紮城中僅止四營合之分紮金縣清遠

之軍不足十營之數儻該匪牽掣安定各軍分撲省垣勦辦更形
棘手雷正綰見已分撥趙德正等二營歸成祿調遣並飭劉正高
等七營馳赴會甯以解安定之圍卽著雷正綰嚴飭劉正高等統
帶馬步七營奮力進勦迅解城圍並著成祿激勵趙德正等會合
助勦廓清東路並飛調鶴齡等軍星速西行以厚兵力前因陶茂
林潰勇偏近陝西省城諭令聯捷俟將潰勇辦理完竣卽速西行
嗣據楊岳斌奏稱業已分別勦撫刻下成祿所部僅止二營不足
以資攻勦聯捷於接奉此旨後卽著統帶所部迅速西進與成祿
會兵一處迅解安定之圍毋得遲延干咎前已諭令楊岳斌刻日
由陝赴甘卽著懷遵前旨星速帶兵前往將各路回匪相機勦辦
並分兵會勦安定之匪毋任滋蔓都興阿穆圖善雷正綰迅卽攻
拔甯靈以便督軍馳赴西路將安定一帶並肅甘等處回匪悉數

殲除肅清關內以靖疆圉其蘭州省城防務卽著恩麟督飭防兵嚴密防範毋稍疏虞成祿所部各軍應用糧草各項恩麟督飭沿途各該地方官妥爲接濟儻該地方官不知緩急玩誤軍糈卽由成祿知照恩麟查明懲辦慶陽糧臺前存應解烏魯木齊餉銀二萬兩前據文煜奏稱已撥解涇州糧臺接濟雷正綰營餉俟各省協餉解到提還歸款見在成祿軍營需餉甚急卽著楊能格迅速妥爲籌畫將前項應解銀二萬兩派員解交成祿軍營俾充軍實正在寄諭間據都興阿穆圖善奏各路軍情喫緊援軍未至並前敵後路籌餉防情形一摺逆回以就撫佯緩我師並未獻城撤圩暗於各處挑濠築壘從上游各渠放水希圖淹斷營路情殊叵測經都興阿嚴拒受降並踴勘地形相機宣洩一面催趲糧米固結軍心辦理尙屬周妥惟援甯竄匪勾結甯郡踞匪堅壁死守分

股撲犯廣武及石空寺堡勝金關等處窺伺中衛甚緊該將軍等札派甯夏道三壽前往駐守卽著嚴飭該道員督率兵團實力捍禦毋稍鬆勁刻下賊情狡詐尤須加意嚴防都興阿等惟當蓄養銳氣修築堤堰換隊移營設計穩慎其花馬池定邊縣後路賊匪雖經翁同書等擊退向羊圈山一帶奔竄靈州大水坑等匪亦將合股向東南竄回陝西是後路及東竄各匪均關緊要卽著雷正綰迅卽督軍由東路前進直取靈州兼顧慶防與後路各軍聯絡聲勢扼截東竄以收夾擊之效安定一帶情形喫緊省垣尤爲可慮楊岳斌卽迅由南路進省以資鎮攝並分兵援剿各路毋事延玩將此由六百里諭知都興阿穆圖善雷正綰楊岳斌成祿聯捷並傳諭恩麟楊能格知之○諭前因甘肅布政使恩麟辦理回務忤和殃民疊經被人參奏並據甘省生員胡第甲等聯名呈控先

後交熙麟多隆阿查辦上年五月閒復令都興阿秉公確查據實具奏甘省回氛徧地日益蔓延若地方大吏能於初起之時妥爲籌辦何至釀成巨患不可收拾恩麟被參各節必須迅查嚴辦方足懲養癰貽患之咎都興阿見在進攻甯夏未能赴省卽著無庸查辦楊岳斌昨已命其馳赴蘭州著該督於到省後將恩麟被參各款一併詳查具奏不准稍有徇隱參摺五件紳士信函一件呈二件均著鈔給閱看將此各諭令知之○以劉坤一爲江西巡撫蘇鳳文爲廣西布政使嚴樹森爲廣西按察使

降調湖北巡撫

○予浙江

陣亡知府甘應槐祭葬世職○丙辰諭軍機大臣等國瑞奏馬步官軍擊賊獲勝嘉祥解圍長溝攻克一摺逆首牛落紅賴汶洗等竄向何處卽著確探進剿務將首犯弋獲極刑處死不得任令漏網任化榜馬賊數千南竄並未大受懲創國瑞當督飭馬步各隊

設法擊剿不得以嘉祥長溝小捷稍涉鬆懈或致逆眾回撲致誤戎機並傳諭劉銘傳陳國瑞當乘此聲威相機進逼如曹州剿辦喫緊陳國瑞卽暫駐曹郡不必折赴劉長佑軍營並著劉長佑等會商妥爲調度張秋至利津河岸最關緊要著閻敬銘懷遵疊次諭旨豫備礮船嚴防偷渡曾國藩運來礮位閻敬銘卽派妥員迎提以利攻剿劉長佑崇厚仍當不分畛域調派兵勇協同山東防兵併力固守毋任偷渡賊不得逞志於東北必將犯豫吳昌壽當竭力防範毋稍疏失南甯一股是否有張總愚在內聞該逆欲回亳州豎旗著吳棠就近督令周盛波張樹聲等軍設法迎擊喬松年令英翰等扼要嚴防亳州等境伏莽並須隨時搜捕毋令勾結郭寶昌不願主將厥罪甚重著國瑞仍遵前旨解交閻敬銘嚴行審訊具奏不准代爲開脫馬德昭是否在營著國瑞查明具奏將

此由六百里諭知國瑞劉長佑吳棠崇厚喬松年吳昌壽閻敬銘並傳諭劉銘傳陳國瑞知之○戊午諭軍機大臣等閻敬銘奏賊匪圍攻嘉祥籌辦河防情形並長溝獲勝嘉祥解圍暨詳陳團練流弊各摺片官文奏遵飭姜玉順等軍赴直東援剿一摺賊匪分股盤踞長溝並圍攻嘉祥縣城甚急經國瑞劉銘傳丁寶楨分派兵勇將長溝賊寨攻拔陳國瑞詹啟綸兩軍亦與黃白旗馬隊將嘉祥之賊擊敗力解城圍與前日國瑞所奏情形大略相同嘉祥縣官吏紳民固守旬餘力保危城尙屬著有微勞著閻敬銘卽行查明請獎見在賊蹤雖向西南奔竄而飄忽靡定曹單濟甯一帶防務仍當加意布置如此時省防情形稍鬆閻敬銘仍常相機出省察看何路緊要卽向何路扼要駐紮妥籌布置至所稱張秋以東防務最關緊要周森藻礮船二十四隻外添雇民划五十隻在

彼巡緝恐隄岸綿長不敷分布著閻敬銘懷遵前旨一面趕製輕便礮船一面將曾國藩撥解直東之礮位及熟習點放之人派員星速迎提駛赴該處一帶分防以免疏失劉長佑因東省沿河兵單分兵越境赴該省沿岸防堵該撫務當與之聯絡聲勢合力同心互相援應以期兩有裨益不可稍存意見團練以堅壁清野斷賊擄掠裹脅爲要務兼須由地方官督辦不可由紳民自行舉行以杜流弊前經疊降諭旨詞意甚明衛榮光兼署臬司公事較多既未能前赴東昌所有沿河北岸一帶團防事宜著閻敬銘卽令派出之道員衡鈴等前往濟東等處妥籌辦理見在賊蹤旣擾及豐沛則淮徐歸德及皖北宿州潁亳等處均形喫重著吳棠督飭淮徐防兵嚴密堵扼毋令賊匪東趨擾及裏下河並清淮一帶曾國藩卽趕緊出省馳赴徐郡居中調度調集周盛波等軍迎頭截

擊喬松年督飭英翰等軍嚴扼宿州並分兵駐紮潁亳搜捕土匪以防張總愚竄回該處句結蔓延張總愚既有回至亳州裝旗之語且所帶止二百人喬松年如能乘其不備飭英翰等密速就地掩捕最爲上策至楚北邊防亦宜豫籌布置著官文卽揀派得力將士扼要駐守以防該匪竄至歸德一帶雖有張曜等軍駐守仍恐不敷分布陳州一帶與潁亳等處接壤亦宜撥兵防守吳昌壽自奏報出省後迄今旬餘未據將該省情形續報著將河北防務布置妥協後卽行渡河而南擇要駐守將歸陳一帶防剿事宜速籌辦理至此股賊匪旣不能渡河而北則竄豫竄皖竄楚北江蘇等省皆不可定各該督撫等務當於各該境層層設兵以待俟大股竄近橫出截擊使其不能成隊俟其遁回老巢卽以重兵圍攻聚而殲之方是一勞永逸之計姜玉順一軍前因直東兵勇漸集

足敷應用諭令吳昌壽將此軍調歸豫省著官文催令迅速起程赴吳昌壽軍營聽候調遣楊飛熊見擬在襄樊招募兩營著官文飭令挑選安分可靠勇丁成軍不得如陳東霖招募赴甘之勇沿途滋事毫無紀律俟楊飛熊將勇丁募齊後卽飭令赴閩敬銘軍營所有該營軍裝器械及兩月口糧均著官文先爲籌給俾利進行前據吳昌壽奏稱僧格林沁所部馬隊在曹郡失利後陸續散入豫境西行見在此項馬隊曾否由該撫招集歸入東省大營著將見辦情形速行具奏將此由六百里各諭令知之○左宗棠徐宗幹奏侍逆由漳州南靖敗竄與先踞小溪漳浦詔安各股逆黨俱至平和會合意圖覓路他竄二十七日高連陞黃少春劉端冕等分路追剿侍逆等共挑死黨數萬迎敵高連陞黃少春劉清亮各飭所部分路猛撲往來衝擊三十餘次賊仍拌命相持高連陞

等各率親兵急從山頂繞出賊後擊之賊大奔潰追至城邊侍逆
又令城逆開礮助勢官軍轉戰而前無不以一當十侍逆倉皇失
措繞城而走城逆亦急開西門狂竄高連陞等率各營衝殺入城
斃賊數千當將平和縣城克復侍逆亦身受重傷各營躡追二十
餘里直至廣東大埔所轄赤石地方始行收隊計是役共斃賊萬
餘名生擒三十餘名其郭松林楊鼎勳兩軍直抵漳浦城外先將
附城賊壘一律掃平緊逼城下賊眾悉退入城內閉門死拒我軍
卽就東西北三門分道環攻羣逆驚駭力不能支由南門奪路竄
走郭松林楊鼎勳督隊分門殺入當將漳浦縣城攻克其雲霄踞
逆知漳浦克復其勢已孤已革總兵吳鴻源復駕輪船駛赴白塔
內港正擬攻剿詎該逆於二十七日已由南門向平和一路竄走
吳鴻源等當將雲霄廳城收復所有此次在事出力員弁可否歸

入克復漳州案內擇尤彙獎出自 天恩 上諭左宗棠等奏官

軍追剿竄賊大獲勝仗連克平和等城瑞麟等奏東路防軍剿賊
獲勝見籌辦理情形李瀚章奏霆營叛卒竄至攸縣即經官軍擊
退見飭分馳剿辦鮑超奏傷疾舉發籲懇續假各一摺平和等城
既經克復詔安一城前據李鴻章奏亦有探聞攻克之信是閩省
賊勢漸就肅清惟李汪二逆合股奔竄既不得逞志於粵東必將
糾合大隊竄入江西左宗棠當懷遵五月十八日諭旨親督全軍
越境追躡務與江西防軍會合夾擊殄滅淨盡不得以驅賊出境
卽爲了事瑞麟郭嵩燾仍督飭李福泰方耀等嚴督兵勇認真防
剿毋徂於大埔一勝遂生懈弛劉坤一已簡放江西巡撫著卽恪
遵前旨速赴新任將江省防守事宜嚴密布置劉坤一未到以前
仍著孫長紱飭令王文瑞等軍實力扼剿毋稍疏虞婁雲慶所部

勇丁既經撫定即可飭令該軍駐紮由閩入江要路遇賊卽擊以壯聲勢而固藩籬霆營叛卒由江西萍鄉竄至湖南攸縣雖經官軍擊退而逆蹤已向安仁一路竄走並渡河焚舟以阻追兵其謀甚狡著李瀚章督飭水陸防軍兼程追剿相機分隊繞出賊前迎頭攔擊迅殄賊氛席寶田一軍已抵茶陵並著孫長紱檄令會合楚軍四面兜剿以期一鼓殲滅成大吉等軍前有旨令其越境追賊此時行抵何處仍著官文查明具奏一面飭令探明潰勇趨向相機合剿不准遷延觀望致干重咎前因霆營勇卒背叛疊經飛諭鮑超停止西征毋庸出關迅赴湖北辦理此事此次鮑超籲懇續假自係尙未接奉前旨故有是請見在叛勇已擾及攸縣安仁一帶事機孔棘著鮑超懷遵疊次諭旨一面趕緊調治一面束裝赴鄂探明叛勇蹤迹分別剿撫遣散卽赴江閩剿除髮逆以副委

任儻再遲延不前任令舊部勇眾日益蔓延自問當得何罪此起
叛勇蹤迹飄忽若由郴桂一帶趨往西南兩廣地方處處可通與
竄粵髮逆亦可勾合爲患更大著瑞麟郭嵩燾張凱嵩各飭兵弁
擇要嚴防毋稍大意將此由六百里諭知官文瑞麟左宗棠徐宗
幹劉坤一李瀚章張凱嵩郭嵩燾並傳諭鮑超孫長絨知之○庚
申諭內閣前因直隸提督劉銘傳赴濟甯汶上一帶防剿遲延當
經降旨將該提督先行交部議處茲據兵部議以降三級調用不
准抵銷係屬咎有應得惟念該提督見在山東帶兵剿賊尙知奮
勉劉銘傳著加恩改爲革職畱任○諭軍機大臣等國瑞奏髮捻
各逆日漸南趨請將僧格林沁靈樞迎赴濟甯覆陳投誠勇目實
心報效清淮礮船到濟咨行直隸換船入黃並統兵提鎮勇丁械
關不能彈壓各摺片喬松年奏捻逆分竄皖防加嚴見籌防剿一

摺楊育才爲苗逆謀主前有旨革職交國瑞劉長佑確切查明正法何以任令逃走著卽飭令陳國瑞嚴加追捕並飭地方官一體嚴拏訊明重辦毋任漏網劉添幅等既無爲鬼爲蜮情事著國瑞隨時加意防維以後儻有反覆惟國瑞是問劉添幅所募勇丁卽著酌量裁撤以弭後患賊匪竄向城武定陶迪南東平汶上濟甯均已無賊國瑞自應督飭馬步跟蹤追剿乃劉銘傳陳國瑞勇丁互相械鬪殺傷多人實屬不成事體該員等均係提鎮大員不思乘賊勢新挫之後奮力追擊而於勇丁互相關殺不能禁止且各執一詞殊失大員體度本當從重治罪姑念該員等均曾立功免其深究見在賊眾南趨著陳國瑞迅帶所部會同托倫布溫德勒克西等馬隊各軍分投追躡毋使羣賊得以喘息滋擾完善地方劉銘傳仍在北路相機駐紮防賊回竄並探賊所向設法進剿國

瑞於該營勇械關一事自稱望輕才淺雖令不行實有不足鎮服之勢刻下濟南布置應已周妥省防可以無虞著閻敬銘前赴濟甯將各勇滋事情節查明具奏不得稍涉徇吳棠派龔文林管帶礮船二十五隻已至濟甯船身較大不能北上國瑞已令龔文林雇礮划裝載至沈家口停泊著劉長佑趕卽雇覓入黃大船赴沈家口迎提令其扼要駐紮以資防剿捻蹤向豐沛一路竄撲疊諭吳棠等督飭周盛波等軍迎頭遏擊本日據喬松年奏河南永城已有賊蹤距雒河不遠其爲張總愚欲遁歸亳州老巢裝旗已無疑義喬松年已飭各將士一體嚴防並令易開俊一軍由宿蒙以至徐州待曾國藩調度所籌尙妥著卽督同英翰等認真防範遇賊卽擊並派兵駐守雒河集一帶以防伏莽句結爲患不准任其向北路回竄一無堵截賊蹤已至永城去虞夏不遠吳昌壽當

督率地方文武嚴密防剿毋任闖入腹地其姜玉順蔣凝學等軍
均卽派員迎提以資得力吳棠仍懷遵前旨飭周盛波張樹聲等
軍將南向賊眾迎頭截擊曾國藩此時應已起程到淮必可迅速
卽當扼要駐紮南北兼籌以期軍有統轄不至沒無紀律何日出
省著卽馳報以聞用慰廛繫賊氛去晉雖遠若由曹考入豫恐復
窺伺晉境沈桂芬務當先事豫籌未可漫無準備前太僕寺少卿
徐繼畬見在年力如何如尙強健該撫卽令其來京陛見候旨錄
用僧格林沁靈柩仍在曹州距賊甚近國瑞欲移至濟甯以便北
上著國瑞一面派撥弁兵一面知照克興阿等妥爲迎護與伯彥
訥謨祜料理伴送來京以昭慎重將此由六百里諭知曾國藩國
瑞劉長佑吳棠喬松年吳昌壽閣敬銘沈桂芬克興阿等並傳諭
劉銘傳陳國瑞知之○諭林鴻年奏克復普洱府思茅廳兩城一

摺據稱署普洱鎮總兵田仲興於二月間與護迤南道夏家疇分
路進兵攻破磨黑賊營二十餘座連破紅巖二臺坡等處賊營直
抵普洱城外四面攻勦遂於三月二十一日將普洱府城克復並
乘勝克復思茅廳城等語滇省糜爛已極經林鴻年勉籌軍餉飭
令田仲興等相機進取該文武員弁咸知奮勉旬日之內克復兩
城是迤南一帶亦尚有能戰之將可用之兵若得該督撫等躬親
督辦軍務自更有起色勞崇光辦理教民一案見已完竣何以尙
在黔省逗留著卽懷遵前旨迅赴迤東郡縣擇要駐紮藉資調遣
毋得再事遷延自取罪戾前因賈洪詔株守成都一籌莫展特簡
林鴻年爲雲南巡撫該撫膺茲重任尤當勉圖報稱豈可復蹈賈
洪詔覆轍並著剋日馳赴昭通會同勞崇光將滇省勦辦事宜妥
籌布置徐圖恢復以副委任滇省餉需支絀駱秉章素願大局仍

當隨時量爲接濟俾利軍行劉嶽昭等見在進規正安州城並著該督嚴飭諸軍節節掃蕩務令滇黔兩省聲息相通則督辦自易得手本日據貴州學政黎培敬奏到省之日是夜城外卽有賊匪放火搶掠並無官兵抵禦平時濫練出入城門不服稽查防守極爲懈弛等語省垣附近一帶賊徒肆擾何以並不派兵剿辦張亮基身爲黔撫所司何事著卽迅督兵練出省剿洗以靖地方其不服稽查之練勇並著嚴行懲辦毋得任令騷擾致居民畏練甚於畏賊也將此由五百里各諭令知之○詔各省整頓保甲○予廣東陣亡知縣張興烈祭葬世職○辛酉盛京將軍玉明奏馬賊出邊遠逸近復探聞進邊竄擾見已派兵會剿得旨據奏出邊遠逸不過敷衍之詞此股馬賊久在邊內盤踞興京爲根本重地設被滋擾蔓延該將軍等自問當得何罪著卽嚴飭豐恩等悉數擒斬

據實覆奏不准再以空言搪塞○予安徽殉難訓導樊熙朝巡檢王宗沂祭葬世職○壬戌諭軍機大臣等崇厚奏布置河防擬令神機營兵紮劉智廟並設立水師一營各摺片劉長佑奏布置防守情形請飭晉豫各撫合力防河陝西撫臣協防豫晉交界並請飭李雲麟等赴直各摺片髮捻股匪見經陸續南竄難保不去而復來黃河爲天險要區防務不可稍疏崇厚見已親赴張秋一帶與劉長佑察看情形飭令署通永鎮陳濟清等分帶兵勇駐紮張秋等處並將洋槍隊紮住阿城鎮爲後路策應其魚山以下之滑口等處亦派副將王永勝等及東省標勇分路堵扼布置尙屬周密著崇厚卽嚴飭帶隊各員實力巡防不得以賊蹤稍遠致形懈弛神機營所派京兵二千名卽著照崇厚所請令其前赴劉智廟駐紮聽候該侍郎調遣周森藻雖帶有礮船七十餘隻其船身稍

大安有礮位者僅有四隻餘皆船小人單崇厚見飭陳濟清另立水師一營酌給銀兩募勇雇船並飭天津道籌辦洋鐵礮數十尊運營惟河道綿長仍恐不敷分撥著閻敬銘再行籌辦水師礮船數十隻選派得力將弁管帶以期聯絡聲勢毋稍遲緩劉長佑因濮范一帶尚須添備船礮已飭大名道范梁等雇船改造著卽妥速籌辦吳棠所撥礮位較重運河乾涸難運卽照所請暫畱濟甯城內應用劉長佑卽將天津存礮提解赴營分撥黃河船隻並將吳棠所派水勇先催赴直余承恩到直時卽著迅速招勇成軍以助兵力所不及劉長佑仍折赴大名相機調度據該督聲稱賊在金鄉嘉祥一帶被陳國瑞截擊復遁至鄆濮等處著國瑞卽行督飭馬步各軍力行堵遏偪之南趨閻敬銘飛檄丁寶楨隨同截剿毋令再行北竄已革知縣楊育才前著國瑞奏稱已由陳國瑞軍

營逸去仍著劉長佑國瑞一體嚴拏務獲見據直隸擒獲賊探供稱該逆欲由直隸交界之處伺間搶渡以入山西著沈桂芬嚴飭前派防邊文武各員嚴密巡察毋稍疏懈劉長佑吳昌壽於直隸交界沿河一帶聯絡籌防毋得稍分畛域賊匪既思入晉難保不思由豫竄秦黃河爲秦晉兩省扼要關鍵自當力籌扼守以固該二省藩籬並著沈桂芬籌撥精銳得力兵勇越境防堵河岸吳昌壽分撥兵勇俟賊蹤竄近豫境卽行迎頭截剿毋令向西北奔竄並籌備礮船來往梭巡毋令賊蹤北渡陝省潼關地方本日已諭令楊岳斌劉蓉派兵防堵潼關以固西秦門戶劉長佑所請之員外郎楊澍道員陳鳴志亦諭令李鴻章飭令該員等帶得力將弁十數人前赴直隸軍營矣李雲麟見已前赴西路該督請令前赴直隸軍營之處著毋庸議本日復據祭酒丁培鎰奏請派兵數千

駐防青州一摺見在賊勢南趨去青郡較遠無須多兵駐紮惟防禦不可稍疏著閻敬銘酌量籌派兵勇與青州駐防兵丁聯絡堵禦將此由六百里各諭令知之○論文麟奏官弁練勇收復濟木薩城垣請催官兵西剿並擒獲賊謀見籌堵剿暨請畱革員差委各摺片濟木薩城爲回匪屯糧之地文麟派令恩錦陶珙等各帶練勇相機前進出其不意將濟木薩城池收復得獲雜糧一萬數千石有奇惟城西三臺一帶尙有馬賊窺伺且文麟拏獲漢奸訊有逆回索煥章糾合黨眾前往瑪納斯堵兵並有分紮阜康吐魯番迪化等情是該逆見雖棄糧逃走難保不仍圖東竄文麟務當督飭在事員弁嚴扼三臺等處要隘實力堵剿毋稍疏虞東路防守事宜扎克當阿伯錫爾仍須嚴密布置並知照伊勒屯何瑄一體嚴防不可稍有疏失陶珙恩錦著照文麟所請暫畱營中差委

以觀後效儻始終不能得力卽著仍遵前旨嚴參治罪不得曲爲解免前據扎克當阿等奏德祥等候交卸鎮篆改派署遊擊尤光組帶兵出關迄未起程等語本日復據文麟奏前聞肅州頭起官兵已抵哈密至今並無音信是德祥之軍行抵哈密一節尙係傳聞之詞萬一賊蹤東犯大局將不可問著恩麟懍遵前旨迅催德祥尤光組等由嘉峪關等處埽蕩而前剋日出關所需餉銀並著恩麟源源籌濟鶴齡一軍前已行抵秦州著成祿調到該總兵所部取道安定進剿肅甘踞匪出關剿賊西路賊氛甚熾成祿部眾無多卽合趙德正馬天祥二營及鶴齡之軍亦恐不敷調遣雷正綰續報之提督劉正高等七營若於安定解圍後由成祿統帶西行兵力自可足用著該提督咨商雷正綰妥籌調派聯捷所帶馬隊五百名並著迅帶赴甘與成祿合兵一處相機前進不准再事

逗留自干咎戾昨已有旨令楊岳斌挑帶精銳兵勇馳赴甘省接
印任事著該督恪遵疊次諭旨剋日赴甘不得稍有遲誤階州踞
逆至今尚未殲除著楊岳斌劉蓉恩麟嚴飭在事員弁迅速攻克
階城盡殲醜類若再日久無功必當從重治罪甯夏郡城久攻未
下著都興阿穆圖善督飭各軍勇猛圍攻迅圖克復甯夏及階州
等城如能攻克庶可騰出兵力剿辦甘回以期次第戡定該將軍
督撫等務當仰體西顧之懷奮勉圖功毋得稍涉因循致負委任
巴里坤等城餉銀業據明誼等分撥銀兩由僻路解往接濟其科
布多所存餉銀著廣鳳奎昌探明道路設法籌解毋令缺乏塔爾
巴哈台前有回匪變亂之信數月以來伊犁亦杳無奏報近日情
形究竟若何並著廣鳳等隨時偵探確情據實具奏本日據劉長
佑奏擒獲賊探訊知該逆欲由直豫交界之處伺間搶渡以入山

西等語已諭令沈桂芬先事圖維山陝界隔一河潼關等處亦須豫籌布置著楊岳斌劉蓉選派兵勇扼要駐紮或於楊岳斌帶赴甘肅之勇隊內酌畱數營並派得力將領統帶扼紮潼關以備不虞毋得稍涉大意將此由六百里諭知都興阿穆圖善雷正綰楊岳斌劉蓉成祿聯捷廣鳳奎昌扎克當阿伯錫爾並傳諭恩麟文麟知之○癸亥諭軍機大臣等吳棠奏賊蹤南竄皖境調兵防扼一摺逆匪張總愚等由蕭永交界之苗村橋地方南竄宿境之龍山石弓山一帶欲由蒙宿等處裹脅民眾東撲清淮刻下徐防正當喫重張樹珊一軍既經到徐著吳棠卽飭該總兵會同姚廣武分路出隊力扼要衝以杜竄突桃源縣境之成子河圩爲清淮東南門戶防守尤關緊要吳棠前派張從龍龔耀倫等軍扼紮尙嫌單薄見又暫調周盛波一軍協同防守著卽飭令嚴密扼防相機

截剿一俟曾國藩到徐此軍應如何進剿仍由曾國藩酌量調遣賊蹤已竄蒙宿一帶該處本有英翰張得勝等軍扼守近日何以未據奏報接仗喬松年前奏商令曾國藩飭調之易開俊一軍由宿州蒙城一帶出境前赴徐州正可迎頭截剿善喬松年卽飭易開俊會合英翰等軍分路截擊毋令竄入腹地致滋延蔓永城既有賊蹤歸德一帶正形喫緊張曜宋慶等軍前駐考城一帶相距尚不甚遠著吳昌壽酌量情形抽調一軍飭令探蹤迎剿力遏寇氛見在逆匪旣分南北兩股濟甯長溝之賊近復遁回鄆濮一帶是豫省兩路防務均關緊要吳昌壽將河北防守事宜布置就緒後仍當渡河而南督飭各軍分投堵遏並將近日防剿情形詳細具奏姜玉順蔣凝學兩軍由楚赴豫正可由陳州一路進發著官文嚴催該兩軍飛速前進不得稍有逗畱吳昌壽一面迎提俟抵

豫境卽酌量何路賊勢較重飭令由何路迎剿毋稍鬆勁將此由六百里各諭令知之○劉蓉奏湘軍疊次出隊攻剿俱有斬馘龍王廟賊目李國厚率眾來降於是胡中和蕭慶高督飭各營於階州舊城山河壩等處築營開濠以扼之三月初九至十六等日該逆屢次衝突均被我軍擊退二十七日復進攻三官殿以上兩壘該處匪徒與舊城山賊眾均情急乞降其龍王壩下坡逆匪亦被我軍洛殺殆盡四月初十一等日蔡逆以四面環圍無隙可窺旋於城中東西兩面開挖地道數處希圖穿越官軍營盤卽由隧道潛遁亦經胡中和蕭慶高探悉情形卽時截阻由是逆計益窘二十一日周達武約會胡中和蕭慶高劉鶴齡黃鼎等派隊齊抵城下不意玉皇觀三官殿逆壘槍礮環施城上亦礮石紛飛弁兵傷亡甚多胡中和偵知三官殿踞逆與城賊不睦草檄招降五月

初二夜賊目僞監軍何仕恩等來營投誠賊援已絕五月十三日
胡中和蕭慶高周達武等舉火轟城時甫黎明地雷響發轟倒城
垣數丈北路各將士肉薄先登其餘各軍相繼而上火器延燒城
內木柵房屋火光燭天賊勢慌亂奪路逸出各軍扼巷截擊賊屍
山積陣斬僞招武王蔡涓榮並生擒僞王將陳姓及僞官曹儒典
等首逆多名惟僞啟王梁城富尙無下落或云被武字營擒獲其
玉皇觀賊壘及西南兩面礮臺亦經我軍踏毀階城內外之賊悉
數殲除無一名漏網卽將階州克復洵足以伸天討而快人心
此次出力陣亡各員弁謹分別開列懇恩獎卹上諭劉蓉奏官
軍攻克階州城池殲除首逆並遣散潰勇完竣陝境肅清雷正綰
奏攻克下馬關等處賊巢擬卽進攻靈州並縷陳餉絀情形暨曹
克忠軍營缺餉請飭陝撫撥解各摺片蔡啟兩逆竄踞階州負隅

死守經胡中和蕭慶高等督率兵勇四面合圍攻克城池將蔡逆及全股悉數殲除謀勇兼優實堪嘉尚至啟逆梁城富是否被武字營擒獲抑已乘閒逸出仍著駱秉章劉蓉督飭在事員弁查明實在下落據實具奏川陝甘三省兵力爲階城一隅牽掣已久今旣擒渠壻穴卽可分路移兵俾資得力胡中和一軍前據駱秉章奏俟階州克復移防敘南一帶見在應如何調遣之處著駱秉章酌量川省情形妥籌辦理雷正綰一軍餉需異常支絀駱秉章素能不分畛域著每月酌量源源接濟以資飽騰昨因捻逆有渡河窺晉之謀諭令楊岳斌酌留數營防守潼關杜賊竄擾秦晉之路此時蕭慶高等軍已克階城自可調回陝省於潼關等處擇要扼紮以便替出楊岳斌之兵全赴甘省林之望所部勇丁疊經諭令毋庸遣撤往援肅州見在安定等處軍情喫緊著楊岳斌恩麟使

知林之望統帶張華全軍先赴該處會合成祿雷正綰所派各軍
力解安定之圍卽行馳赴蘭州相機前進階州善後事宜著楊岳
斌恩麟妥爲籌辦務令流亡復業毋得視同具文半角城豫望城
下馬關等處久爲回逆巢窟經雷正綰督飭各軍奮勇進攻疊克
堅巢剿辦甚爲得手卽著該提督與曹克忠各軍分路並進直搗
靈州肅清北路都興阿穆圖善督兵圍攻甯夏郡城日久未下殊
屬延玩著卽激勵兵勇奮力圍攻迅圖蒞事不得再事遷延致干
重咎昨因成祿兵力太單諭令雷正綰將派赴安定之劉正高等
七營於解圍後由成祿酌帶西行第雷正綰先後派撥十二營駐
防安定一帶見在雷正綰乘勝進規靈州兵力未厚若由川省酌
撥數營進駐安定一帶則雷正綰先後派出各營仍可酌量調回
策應著駱秉章斟酌情形妥籌調撥陶茂林營中潰勇由兩當南

趨者業經漢南地方官弁分別遣散押送回川後起潰卒亦均遣
回原籍其漢南一帶仍著劉蓉嚴飭各府廳營縣隨時確探防範
將餘匪搜捕淨盡並著駱秉章飭令地方有司將遣散勇丁妥爲
安插毋令生事雷正綰移軍北進轉運亦艱必應寬籌糧運方能
源源接濟不至枵腹荷戈著恩麟楊能格飭屬就近籌運糧草毋
令缺乏前因雷正綰營中糧運緊要諭令劉蓉飭林壽圖派員督
辦何以尙未辦理著劉蓉督令林壽圖實心區畫妥籌接濟不得
稍存畛域之見致誤事機陶茂林部眾潰散所存無多見在曹克
忠一軍營數日增糧餉兩絀該總兵打仗向稱勇往若令飢軍無
食譁潰堪虞著劉蓉卽將陝省按月解供陶茂林餉項軍火改解
曹克忠軍營並製造帳房數百架一併解往以濟要需毋稍遲誤
將此由六百里諭知都興阿穆圖善雷正綰楊岳斌駱秉章劉蓉

並傳諭恩麟楊能格知之○陝西巡撫劉蓉奏辦理甘省潰勇等
事與德興阿意見不合據實上聞得旨朝廷於各該臣工是非曲
直及人品心術自有鑒別該撫惟當實事求是爲所當爲不矜才
不忤物亦復何恤人言○是月豁免哈密被擾屯田糧石地課蠲
緩廣西橫州等三十二州縣被擾額賦